


Miixuttiho sa Kapiriyeli Wa Daniyeli

 Apwiya yooreeriheni, munna. Mooxeleliwa, apatthani. Khureere oviha, wira nikhale mutapernakulu voosiis'ula, masi okhala va ti wa nttittimiho vanci-ene. Nootteeliwa murima owerya—owerya ophiya olelo mwaha wa mutek'ola. Ni kaahihimya wira kaarowa okhalana musomelo vano wa *Isumana* iya *Miloko mithanu na miili Sa Daniyeli*. Eyo ennilikana ni Mutthaka mukina kihinatthi okelela ohoolo ni i—Ikanyeryo Thanu na piili. Seiyo sikhhanle, Ikanyeryo Thanu na piili; Ihasara Thanu na piili; Malope Mathanu na maili; Otakhaliwa Miraru; muthiyana vansuwani; xetwani ooxeerya onriheliwa ota; athu ikonto miloko muloko ni miloko mixexe n'atthu ikonto xexe ootthittiwa ekanyeryo; sothene siniiraneya muhina m'okathi yoola. Nto kuupuwela wira kaahaana ohela-mo yeela toko.

2 Vano, vaaviha. Hiyo khanintthuna olekela vanci-ene, ntoko sinwery'ahu paahi. Ni ola p'ukathi, voolimaleleya, okathi wowiitthyuuwa, athu ahinrowaaya okereja imaara sinci-ene. Ni, vanci-enexa, ni othene ale arina mapuro ooriirihiwa saana, ni siiso, memmo onkhala moohakalaliha-mo. Hiyo naanithuna nikhalanne-ene yeeyo, masi okathi ula hiyo khanirina.

3 Anci-ene w'axitiithi ahu a khalayi yaakilaathiki vansuwani vooviha. Kuupuwelaka waavekela musammaha athu mwaha w'ohikhalana esaala erina ekaruma y'ettheke yooriirya, miyuupuwelo saka kweekwe sinthikela wAfrika weiwo awo yaakhal'aya vale ni ittheke iye sa ikuru, ni athiyana ale ni maihi aya emorelaka wiitho waya, erupaathaleene vale othana n'uhiyu, ehikhumaka nipuro vaaphwanyaney'aya; khayaalya, khayaawurya, hat'etthu, yaakhala vaavale wira evare Nuulumo nimosa, wala maili, okathi vakhani, a Apwiya.

4 Kinniwerya wuupuwela oMeexiku okathi waavihaaya, vaxariya, kaahikilaathi esaala emosa ya ekaruma y'ettheke yooriirya kipacerya wiivekhulela, waari wooviha saana. Ni kaaniwoona athu ale yaaphiya vale ewoora yaneethanu na xexe voosiisu, nipuro nle nuulupale, ni vahikhanle ikhukulu, wira ekilaathi. Athu oowereiwa, oowereiwa saana, eluwelaka, aretta; kankuru, nipotthe; ni aximai aretta, anamwane, axikhaani ooluwela ni itthu sothene, yeemenleene vale vansuwani vale noorusula, vahikhanle muuttutthi hata nipuro nimosa, ni ophiteeryana paahi mmosa ni mukhw'awe okhuma ewoora thanu na xexe voosiisu mpakha thanu na xexe ohiy'ule, wira yiiwe minuutu miloko miraru paahi ni mulipa-ootaphulela, ni woona miteko s'Apwiya. Yaakilaathi vale n'ulipelela, ewanreene ikuwo suulupale soolemela, awo aniwara eyiita ni elimwe. Ti yeeyo arinas'aya.

⁵ Vano nto kinnuupuwela okhala murupaathaleene iwe muhina mwa itakhwa iye, moota yaarowaaya oruuihwa atthu ale anwereiwa, yahaawerya nnakhala wiittikinya. Ni oHintiya, okathi waapwehiwaaya mmosa vathi, nto n'upwehiwa mmosa vasulu vawe ole mmosa, mmosa vasulu vawe ole mmosa, siiso, ni makuttula ni iretta; weiwo yaaruuihwaaya epuruliwaka, mphironi, ni waarupaatiha vamasuwani vale, wooviha, a otroopiku. Mutthekuni sa ikuru, ni overunya ni okukutteya, ni itthu siiso, awo yaanikhala vale vansuwani vaavo ni ettheke ya ikuru, ni sothene, ni khayiittikinya wala wiikhupanyerya, paahi . . . ni ophavela ophwanya Masu kamosa-kamosa a Muluku, vano, etthu emosa ya munep'aya. Vano xeeni naarowel'ahu wiisaakiha voosis'ula, ni nipatho vamuru vahu, ni mavekhuvekhu evaraka muteko? Naahaana wuuliwa muru naikhupanyeryaka mwaha wa yeeyo.

⁶ Tivo kinnuupuwela woohikhala khalayi, vasisironi, emosa wa isisiro Opahari y'Okuusini, kaarina muteko w'okokhorela weiwe ohiyu yoole. Nto, oh, khuvenya ettheke ya ikuru. Oh, kiira kihinatoko woona ettheke ya ikuru siisaale, overunya n'uverunya, omwaleelaka elapo eyo. Ni moota ittheke saarum'aya mpakha miri omorela vathi. Miyo khwira, "Ahe, awo a . . . vanreerela kirule ekhasako aka, okhala wira khaavo onrowa okhala vathi vale."

⁷ Okathi vakhani ekaaro ekhaani khuveveleya mpakha vamukhora, nto mutthu mmosa khumana mukhora, oolikana wira arowe.

Nto miyo khumwiirela mmiravo owo, owo aaniwerya olavula Enkelesi, miyo khwira, "Ookhala mutthu iwe?"

Khwira, "Khivanweryaneya hata ovira eriyari ya ikwarterawu sa nipuro nlo," yaari eparkhi emosa yuulupale ya mphira.

Nto miyo khwira, "Munihimya wira atthu ari—ari vate vale siisaale," miyo khwira, "n'ittheke ila yothene?"

Awo khwira, "Awo antthuna wiiwa sa Muluku."

⁸ Nto—nto siiso miyo khurwa vaavale. Ni yaahikhala axithiyana, aximwali, axaamiravo, ehaapaka ni ehitheyasaka, ehinyamunyaka exuwinka, ni olavula sa mposi aya. Khula Masu, awo yaalipa ni Yaawo; ni khayiittikinya, yaamukilaathi paahi khunaiwa. Wihana waltaari, wihana waltaari paahi, nto atthu ikonto sene yaanivenya, ni maithori emoraka mmaithoni mwaya siiso, matat'aya emuvenxenryeene Muluku, etthunaka omoreliwa ikharari mwaha wa munep'aya, aximwali n'aximiravo, a iyaakha, muloko ni thanu na piili ni muloko ni thanu na ttharu. Vano ti yoorika owerya wira atthu aalweene yiiwe, moone. Eyo—eyo enooniherya wira khanirina hat'etthu yo wiikhupanyerya. Ni mahala a Muluku! Ayo, mulopwana.

⁹ Naanithhuna okhalana sothene sa vano ntoko atthu akina a wAmerika, masi khanirina siiso; tivo ninookelela ohoolo n'ile erin'ahu.

¹⁰ Vano, kookhalana etthu yaamukhaani kiwehaly'aka wira kaanithhuna wira-tho va mutapernakulu. Akavi arina aBibilia, nvenxe ntata. Vaareera. Nrowe nikhunle Masalmo 99 nihinatthi ovekela. Hiyo naaniiraka yeela, Munna Neville, iyaakha sivinre. Nkisuwenle sinto...Moosoma Masalmo voosiis'ula? [Munna Neville oniira, "Nnari."—Mol.] Nnari. Kintthuna paahi, muthukumano, osome Masalmo.

¹¹ Voosiis'ula, kiry'ene musaala mwaka m'osoma, kitthokelelaka Mutthak'ola ni Masu, Miyo kaahuupuwela, "Moosuwela, yaamukhala yooreera-tho waaruma—waaruma awo osoma Masalmo. Vannikisivela saana."

Etthu kaapisenry'aka vakhani, kaarimwiihaniwa otthu woorakama-wo, okhuma oCheyenne, vano waari mwaha wa yeeyo.

¹² Nto vano, nikhunlaka Masalmo ala, kookhalana mihupi kamosa-kamosa soohimya, kimanly'aka wunnyiwa. Eyo Masalmo 99.

¹³ "Okhuma vano mpakha ohoolo, mihupi sothene sinihimya mithukumano va otapernakulu, ni ikampaanya, sinrowa okhumaka oskritooriyu oJeffersonville. Khula mutthu onthhuna osuwela sa mithukumano ohaana olepa, wala ovaha nsina naya ni onkhal'aya, n'upweha vapulpitu wookiseryani wa muteko olelo ohiyu. Munooveleelihiwa muhupi m'okathi wira mwiithokihe wira mukhale vamithukumanoni."

Eyo ti, akhala mutthu ohoolo onthhuna osuwela paahi nipuro onrowaahu okhalana mithukumano, hiyo nookhalihani enamuna emosa, oskritooriyu iwe vano, mukhanly'anyu ohiyaka nsina nanyu ni onkhal'anyu va. Nto hiyo ninimooveleelihani epaphelo, khalayi ene, wira musuwele nipuro siniiraney'aya mithukumano, ni alakela myaha sene, ni etthu ekina ekhanle, mwakhalana vale oreeriwa wene. Moone, mwaahikhalane nipuro na nttittimiho enikhum'aya-wo, mmosa onihimya *ela* nto mmosa onihimya *ele*, nyuwo—nyuwo khamunsuwela, moone. Vano muhele paahi...Mulepe nsina nanyu ni onkhal'anyu mpwehe osulu nno, nto Billy Paul onookuxa ni onoosuwelihi.

¹⁴ Vano, yaahikohiwa, nave-tho, sinto enookhala-tho... "Munna Branham, munookhalana-tho miteko sa ovoniha mutapernakulu, ni olamula sa mmurimani?" Nnari. Nnari. Olamula sa mmurimani sinoovaheriwa ni—ni nikhuru nahu nikina. Nookhalana Munna Neville va vano orina yoovaha y'eprofeta, onihimya s'eprofeta mwaha w'aretta ni onaasuwelihi itthu sintthuneya wira awo esuwele. Ni nookhalana munna mmosa onihaniwa Higg-...Higginbotham, mmosa e...aari atiministratoore, aahirumeela voororomeleya-vo munikhuruni.

Nkinimoona voosiis'ula, masi voolimaleleya owo ookhalana yoovaha y'olavula ilavulelo. Ni muhano mmosa mwaamukhaani onihaniwa Arganbright, munna mmosa mukhaani oophenteya orina yoovaha y'otaphulela ilavulelo.

¹⁵ Ni mitthaka iya sinnooniherya okhala sa Muluku, okhala wira khasiniiraneya vootepanyeya, iyo siri voolikana. Vano soovaha iya simalakaru othukumana, ninrowa ophavela o—ophwanya e...okhaliha-tho mukereja, enamuna yo wira. Ni miyo kihaana okumana n'awo vahilekenle, ni siiso wira mi—wira mi—mithukumano siiraneye vooreerexa mwa eyeettiheryo y'Apwiya, vooreerexa ntoko sinwery'ahu.

¹⁶ Masi atthu ala oophenteya, ntoko sinihimy'awe namwaattamanani aka, Muhano Wood, yoowo orina miikrofooni silikariwe va, ni efiita ottuli iwe, wira akaravari muthukumano, wira akhalane mitthaka iyo paahi, ni olepa seiyo, ni woona sinto ti soolikana wala nnari. Munnona? Ti siiso owo oniwehawehaawe. Miyo kinnimusuwela Muhano Wood okhala muthiyana a nneema. Ni owo onnikileela itthu sinci-ene sinihimmwaka, siniiraneya.

¹⁷ Vano, tivo hiyo ninnixukhuru mwaha wa yeeyo. Moota okhanly'aya okhurunuwa wa miyo owaani, kaaphiyaka owaani, nto. Olamula iwe sa mmurimani epante y'oprofeta onnikikhulumula tu, ni, tivo, Muluku ookiveleeliha okhurunuwa murima mwa yeeyo, muhina mwa ohimya s'eprofeta, ni olavula ilavulelo, ni otaphulela, okhanle ohimya s'eprofeta. Yeeyo, ekhanle ohimya s'eprofeta, olavula ilavulelo. Aakhala atthu aili oovirikana anihimya s'eprofeta. Mmosa alavulaka, mukina aya aiwaka ele mmosa onihimy'awe ni ilavulelo soohisuweliwa, ti ohimya s'eprofeta woolikana. Nto vano ninrowa okhala... Ninnikhalana eyo khula nihiku, khula muthukumano va hiyo ninnikhalana iliinya sa mavekelo vamuthukumanoni.

¹⁸ Vano, onookhala mutthu aarowa okoha, kiireke...mwaha wa yoovaha. Ayo, nlelo kookhalana. Masi enamuna yeeyo, enamuna emosa enrumeel'aka, moovaanelani w'omeekha, kinikhalan'aka. Nto, wira mphwanye, kookupali wira yookhalaniwa vakwaaturu ottuli iwe, wira mutthuniheriwe ni okhaliha okathi anyu orateene, ni Billy Paul, mwan'aka, wa vaava wala mithukumano sinoorwa nuumala ola. Mmapuwani, nipuro pi nipuro, muhaana okhalana ettikitti yaamukhaani Billy Paul onrowaawe woovahani. Yaakhanleene etthu mmakhaleloni muhinwery'anyu osuwela, ni muhinsuwel'anyu moota w'okhuma mwa yeeyo, nto munatthuna ankhili a Apwiya, vano muhiye... Mukumane ni Billy Paul, mwan'aka, yoowo okhanle sakarataari, nto owo onimoovahani ettikitti yaamukhaani, ni woohelani nihiku, okathi.

Vano nto naakhalanaka mivaanelo iyo, nto owo p'ukathi onivolowaahu vamosa, nyuwo ni miyo paahi. Nto yakhala

athiyana anoorwa, munoovolowa ni miyo n'amwaar'aka. Vano nto nyuwo. . . Ninoosuwela, ni waaphavela Apwiya ni waakoha Yaawo etthu erin'ahu wira.

¹⁹ Vano, ekina, myaha sikhaani ni sikina siiso, onivahiwa Munna Neville, ni Munna Higginbotham, ni Munna muthiyana Arganbright, ni akina anlavula ilavulelo ni otaphulela, seiyo sikhhanle vaava mukereja.

²⁰ Tivo, niri ntoko mukwaha. Kookupali wira aari Yetru, aamuhimenrye Moise nihiku nimoso, moone, "Nrowe naakuxe ahumu kamosa-kamosa." "Nto Eroho ya Muluku yaahikumihwa mwa Moise khuheliwa mw'ahumu miloko mithanu na miili, vano awo yaanihimya s'eprofeta. Masi itthu suulupale ni soolipa paahi aanirweeliwa Moise." Vano, hiyo khanihiyo Moise, nnakhala ahumu ala, masi hiyo nlelo nimmurumeela Muluku Yehova, ni Nlumi na Mooro nimosaru ninnihoolela mpakha Muttetthe wa natiri.

Vano, nto, ayo, sinookhala sikina, sinookhala mithukumano ni onookhala otaphule- . . . Olamula sa mmurimani onimoorwa. Eyo enookhala ekivahaka okathi nto w'okhala mmavekeloni ni osoma, mahiku kinsuwel'aka wira mivaanelo iya sinimoorwa, ni okhala oolikana mwaha wa seiyo.

²¹ Vano muupuwele, Billy Paul Branham, sakarataari ahu a vapuwani, ono. . . Eri va. . . Epaphelo eri vakwaaturu ottuli iwe, ni maatiministratoore. Kookhalana yookwerethiwa emosa va wira kihimye yeeyo, ni wira kaaleele atthu wira anoowerya osoma vakwaaturu, yaakhumaka.

²² Vano, vano, voosiis'ula nookhalana nisomi nimoso nuulupale, ni ohiyu ninrowa wehererya otthikela nenlo. Ni, Apwiya yatthuna vale, Ettiminku enrwa, nikina, mwa yeeyo. Nkaasuwela mwiixeryo xeeni naarin'aya mpakha ophiyererya osoma. Ni nlelo owo mwiiriirya wa miyo, nnakhala vo, ni siiso kinlipa n'Apwiya paahi.

²³ Vano, nyuwo n'aBibilia anyu, nrowe nikhunle Masalmo 99, 99. Nto kinrowa osoma versiikulu 1, muthukumano onoosoma versiikulu 2, nto othene vamosa ninrowa osoma eversiikulu yookiserya. Ninootthikela; miyo, 1; muthukumano 2; miyo, 3; muthukumano, 4; nirowaka mpakha eversiikulu yookiserya, vano nto ninrowa osoma vamosa.

Nrowe nivenye okathi onsom'ahu Masu a Muluku. [Munna Branham ni muthukumano ansoma Masalmo 99:1-9 ntoko sihimaly'awe—Mol.]

APWIYA ti mwene; maloko othene ethukumeleke: awo annikilaathi vasulu va makerupi; elapo ettikinyeyeke.

APWIYA ti aalupale oSiyoni; ni awo annilamula maloko othene.

Awo evuwihe nsina nanyu nuulupale ni noowoopiha; maana ti noowaarya.

Nave-tho oweriya wa mwene onnisiveliwa n'ixariya; ti nyuwo munivaha ikano, ti nyuwo munirruuha exariya n'ikeekhai mwa Yakope.

Mwaatthapele APWIYA Muluku ahu, mukokhore vathi va inawu saya; maana awo t'owaarya.

Moise n'Aroni yaari alipa a mukuttho, ni Samuweli aari mulipa-ooromola nsina naya; awo yaaniwiihana APWIYA, vano awo yaaniwaakhula.

Awo yaanaalavuliha muneekuni na mooro: awo yaahiiwelela sooruma, ni ikano saavahalyaya.

Nyuwo mwaaniwaakhula, O APWIYA Muluku ahu: nyuwo mwaari Muluku mwaalevelenle, muhihiyaka waahukhumu mwaha wa soowiira saya.

Mwaatthapele APWIYA Muluku ahu, mwaakokhoreleke vamwaako vaya voowaarya; tthiri APWIYA Muluku ahu t'owaarya.

24 Nuuramihe miru sahu.

Vekeekhai, Pwiya, Masu ala alempwe ni akwerethiwe ni murumeyi Anyu, Davidi, mwa Masalmo wa Nyuwo. Nyuwo munikhala varyari va Makerupi. Nyuwo mwa oowaarya, ni mwaako Anyu ti woowaarya. Munitthuniherye naattamele ni mirima sahu simwaraxeliweene Ephome ya Pwiya Yesu, ni muupuwelo wooloka, nave ni waamini ni nrromelo wira ninrwa Ohoolo wa Muluku ahu. Muhiye muthukuman'ola wothene okhale woottittimiha. Mutthukule maaru ahu oowiiwa saana. Mulavule mwa hiyo, ni ankhili, wira nisuwele moota wo wiiseettiha mmansihu mahiku ala ni Ohoolo Wanyu.

25 Naatthuna noovekeleni Nyuwo, Muluku ahu, wira munuupululele itthu iya sa esiiri siipithiwe iyaakha iya sothene, okathi onaattamel'ahu Masu oomalela okhala a exariya, ni a nttittimiho. Nyuwo mwaahihimya yeeyo okathi waary'anyu muumu elapo ya vathi, ni mwiirale, "Ole onsoma, aiwe." Tivo, hiyo vooreera murima ninoorwa wa Nyuwo, Pwiya, n'uphavela ankhili Anyu, nihisuwelaka tu etthu y'ohimya. Koohela va oratteene Soolempwa vakhani, ni va nttittimiho ni kinlipa voomalela ni Nyuwo, wira kiphwanye yo waakhula, maana khiivo etthunelo ekina masi wira nisuwele okathi onkhal'ahu, wira nikhale oolikana wa itthu suulupale siri ohoolo. Munivahe seiya, Pwiya, mwa Nsina na Ole oniixuttihale hiyo othene wira naahaana olompa sa! [Munna Branham ni muthukumano anvekela vamosa ntoko Matewu 6:9-13.—Mol.]

. . . Tith'ihu muri wirimu, nsina ninyu Nivuwihawe.

Omwene anyu orwe. Otthuna wanyu wiireye vathi va, ntoko wirimu.

Munivahe olelo yoly'ahu ya khula nihiku.

*Munlevelele sootheka sahu, ntoko sinaavelelel'ahu
ale annitthekela.*

*Muhinihiye omora nehereriwaka, masi
munaakiherye sootakhala: Tthiri omwene ti wawinyu,
n'uwerya, ni ovwa, mahiku othene. Amen.*

²⁶ Mukilaathiki. Vano, yakhala alopwana antthuna orula ikhasako saya, mukhale ootaphuwa. N'ale yeemenle erukurenrye-ene i—ipante s'exiri, inawu sanyu saawereyaka, vano, mukhale ootaphuwa okhumela vate.

²⁷ Nto vano, kinoona wira, anamwane yatthuna orowa musaala mwaya, ahiiso aalahiwa? [Munna Neville oniira, “Nnari, khanwerya. Khaninwerya okhalana voosiis'ula, mwaha wa muttitthi w'atthu.”—Mol.] Pastore ohimyale wira muttitthi woosarya musaala, tivo khanikhanle okhalana exikola ya Ttiminku y'anamwane. Nto naamukhala ootteeliwa murima nyuwo axinamwane vano mwaiwanana ni hiyo, okhala wira voosiis'ula ninkhalana, nimpacerya Mutthaka mmosa, muulupale ni wo wunnuwaxa kikupanly'aka wira onrowa ohimya etthu yuulupale w'atithi anyu n'ame anyu, n'ale oophentiwa anyu ari vaava, ni hata wa nyuwo anamwane. Tivo, ninaattamela ni nttittimiho saana.

²⁸ Apwiya yatthuna vale, voosiis'ula ninrowa okuxa mwaha wa isumana miloko mithanu na miili sa Daniyeli. Ni voosiis'ula ninlavula mwaha wa Daniyeli w'epotthani, nto Kapiriyeli onoorwa avavaka wira amwiixuttihe sa ohoolo. Okathi Daniyeli waavekel'awe, Kapiriyeli, Nlaikha, aahirwa wira amwiixuttihe.

Olelo ohiyu, kintthuna kilavule itthunelo thanu na mosa sa othotola Wawe, miyaha mithanu na mosa soovirikana wira kiruuhe olelo ohiyu, seiyo Kapiriyeli saarweenly'awe.

²⁹ Ettiminku enrwa, Apwiya yatthuna vale, kintthuna kikhalihe niwoko ni okathi wa Okathi Mithanu na miili sa Ekereja, ni okathi siniiraney'aya, ni vatthu oniphwanyaney'ahu olelo. Eyo enrowa okhala Ettiminku enrwa voosiisu, Apwiya yatthuna vale.

³⁰ Vano, niwoko na yeela. Miyo kooruwa soolepa kamosa-kamosa sikhaani sa Mitthaka saka kamosa-kamosa sookiserya. Nto voosiis'ula kintthuna olakiherya, okhala wira ela efiita ya makineeti enrowa orowa molumwenkuni mothene, ilapo sinciene. Ni, kweekwe, etthu enlakheryel'aka n'ile y'ottuli, mwaha wo wii khino ookala aarowa wiiwa efiita emaara yoopacerya, ahaarowa owerya wiiwa saana etthu kaahimy'aka kaalavulaka etthu ekina y'ottuli.

³¹ Hiyo noovira miyeeri vano nisomaka Eliivuru ya Wiisuupulula, Wiisuupulula Wa Yesu Kristu. Noovira nihimyaka okathi wa ekereja. Ikapiitulu tthaaru soopacerya sa

Wisuupulula waari okathi wa ekereja. Vano Yohani aahikuxiwa muroohononi ekapiitulu 4 ni 5, ni aahoonihiwa itthu sa—saarowa okhumelela nno. Vano, ekapiitulu 6, owo onikhuruwela-tho vathi, wira oone itthu sinkhumelela sinrowa okhuma kapiitulu 6, versiikulu 1, mpakha kapiitulu 19 versiikulu 21. Va sinikela Ikanyeryo, Ihasara, Otakhaliwa, nasope, mu—muthiyana vansuwani, ni oriheliwa vathi wa ehanasi yooxeerya, otthittiwa ekanyeryo w'ale ikonto miloko muloko ni miloko mixexe n'atthu ikonto xexe, n'itthu sothene iya.

³² Ela ennikhala esumana yuulupale ya osoma. Nsana, nihiku nothene, waanikirikela okhuma musaala, kiphavelaka osoma. Ni eyo etthu emosa okathi wookiserya, anci-ene w'ale a khalayi va, kiwiixuttihaly'aka, miyo kiirale paahi, “Va ti nipuro sinkhum'aya isumana miloko mithanu na miili sa Daniyeli,” masi nkaaphavenle ohimya, olakiherya. Masi okathi ula, ni mahala a Muluku, kihivaha mmansaka ophavela oveka mahala ohoolo wa Muluku, wira kaaruhele atthu. Ni muumu kiniphwanya itthu kihinsuwel'aka hat'etthu ya seiyo.

³³ Ni, nto, ki—kinnikhalaka kisomaka eliivuru ya Dr. Larkin, eliivuru ya Dr. Smith, soolepa sa Dr. Scofield, itaphulelo soovirikana s'atthu mapuro othene, ni nnakhala vo nkinwerya otakanxa sawaya vamosa wira sikhumele oratteene. Munnona? Tivo, esuman'ela kintthokiherya, othotola epipiliyoteeka oKentucky, wa etthu ya osoma ittheneeri wa khalayi ni ikalentaariyu ni okathi, okuxa mpipiliyoteekani, ni siiso, iliivuru sothene sa khalayi kinwery'aka, ni yaamukhaani enwery'aka wira, ni okhalana nrromelo aka va nttittimiho mwa Yesu Kristu wira akuupululele.

Okhala wira, nkinthuna eyo wira kiireke, “Kinnisuwela *ela*, ni kinnisuwela *ele*.” Owo onnisuwela murim'aka. Owo onnikiiwa. Masi kintthuna, wira kaamwaleele atthu Awe, tivo kookupali wira Owo onookivaha yeeyo. Mpakha va nkinsuwela, masi kinimuroromela Yoowo Ettiminku enrwa, 'okhala wira eyo enrowa okhala epantte yuulupalexa, Ettiminku enrwa, osuwela ni olakiherya isumana iyo miloko mithanu na miili.

³⁴ Khula emosa erina nipuro noovirikana. Nto mwaira vale, munoorowa ohelela sothene, khasinlikana oratteene, khasinlepeya oratteene. Khinweryaneya. Nto, tivo, miyo—miyo pooti ohiwerya okhalana oratteene, masi kinrowa waaroromela Apwiya yeeyo.

³⁵ Ni kinnimuupuwela Salomoni emaara emosa alompaka ni aavekelaka Apwiya Muluku wira Awo envahe ankhili, kahi mwaha wa yoowo, “kahi wuncereriwa mahiku, kahi ekumi yoolekela, kahi mihakhu,” masi wira awerye okhalana ankhili wira asuwele moota wo—wo—wo waalamula atthu a Muluku. Ni Muluku aahittittimiha nivekelo nlo, khunvaha Salomoni ankhili, okhala wira waari mwaha w'atthu Awe. Nto

ti yeeyo eninvekel'aka Muluku wira akitthuniherye osuwela etthu enihimy'aya isumana iya miloko mithanu na miili, okhala wira koosuwela wira eyo ti ekalentaariyu yoolikana ya okathi onikhal'ahu. Nto, tivo, kintthuna kisuwele; kahi wa yoomi mmansaka, miyo ka...kahi wa yoomi mmansaka. Vekeekhai, kintthuna kisuwele. Nkinihimya siiso, "Kahi wa yoomi mmansaka," okhala wira yoomi kinnitthuna mmansaka. Kintthuna kisuwele, okhala wira kintthuna kisuwele vatthu vanikal'ahu ni okathi xeeni onkhal'ahu. Ni, nto, koosuwela wira eyo yaahivahiwa.

³⁶ Ni anci-ene yiiwale enamuna yoovirikana, khuhelela ottaiwene wu. Mutthu mmosa, miyo kaamusoma, aarina yothene omalela 1919, sa isumana miloko mithanu na miili. Ahe, khayaari siiso.

Tivo, nuumala isumana miloko mithanu na miili, nuumala isumana miloko mithanu na miili, sothene sinoomala. Vano hiyo—hiyo khani...Nintthuna nisuwele Ekeekhai. Ni kininvekela Muluku akivahe Ekeekhai.

³⁷ Vano, wira kikhaliherye, nitthikele, kintthuna kitthikele oweha vakhani ottuli. Vano, tivo, soolepa kamosa-kamosa kilepaly'aka, naarin'ahu mukapiituluni 5, 4 ni 5, wira atthu yiiwe saana. Yoopacerya, nihinatthi wira yeela, kintthuna kilakiherye, wira nyuwo mukuxe okhuma 4... .

Vano, muupuwele, kapiitulu 3 waari Okathi wa Ekereja ya Lawotiseya yaakuxiwaaya woomalelani wa Lawotiseya.

³⁸ Vano, kaaphavela waaleeliherya etthu amwaar'aka ya yeeyo. Kaahikhalana Becky, mwan'aka muthiyana, ni atisiyonaariyu a inamuna soohiya-hiyana ni itthu naawenry'ahu ophwanya. Khayaanivaha waakhula. Kimuphwanya tisiyonaariyu a Bibilia. Kimuphwanya tisiyonaariyu a Ekreku ya khalayi. Ki—kimuphwanya we—Websters ni sinci-ene sikina, atisiyonaariyu a naanaano. Khaavo hata mmosa aawerya ovaha e...ovaha moolumo ene wala waakhula, khula enamuna.

³⁹ Amwaar'aka khwira, "Munwehererya sayi atthu ahu, akhanle atthu oohaawa, ni anci-ene aya oohisoma ntoko hiyo siry'ahu, osuwela saana etthu ntoko eyo?"

Miyo khwira, "Muluku onoovaherya yo waakhula."

⁴⁰ Hata wira enrika sayi, Muluku onniwerya opwexakasa n'ukhaliha yookhweya. Maana hiyo na e...epantte y'atthu ale anlipelela, avekelaka mwaha wa nihiku nenlo ni okathi yoowo. Nto maitho ahu anweha Wirimu, ni ninniwehaweha mwaha wo Orwa Wawe. Ni kookupali paahi wira Owo onoononiha. Vano, khenrowa onileela nihiku wala okathi, 'okhala wira khaavo mutthu onrowa osuwela eyo, masi vekeekhai onoonileela nihiku na esumana enkhal'ahu, nawerya-ru paahi woona oratteene.

⁴¹ Vano, ekapiitulu 4, Yohani aahikuxiwa naanaanoru, nuumala Ekereja. Yohani, arowaka osulu, owo aahoona okathi wothene wa Ekereja. Ti vaavo kaatthun'aka weemela, okathi vakhani paahi, kihimye, wira: atthu anci-ene anlipelela etthu yuulupale, yoothukumeliha murima, ya ikuru wiiraneya, okathi w'Amalapo, vekeekhai aavonya. Okathi wa Ekereja, ni sothene sinrowa okhumelela okathi w'emwene w'Amalapo, yooempwa okhuma Wiisuupulula 1 mpakha Wiisuupulula 3, nave. Vano Ekereja yaahikuxiwa khuroihiwa osulu, ni ekina ya yeela, mpakha kapiitulu 19, t'ile enaakhumelela nloko n'aYuta, nuumala Ekereja owela. Nto owo okathi wo Ohaawa wuulupale, khiivo eniireya eriyari y'Amalapo; wiivanana paahi, ni sikina, yeeyo enrow'ahu ophiyerya ni woona.

⁴² Masi Ekereja, Eneene, yoorowa mwa 13...Eversiikulu yookiserya ya kapiitulu 3 ya Wiisuupulula, vammal'aya Okathi wa Ekereja ya Lawotiseya, yeeyo yaari yookiserya.

⁴³ Ni hiyo nookuxa khula okathi wa ekereja, khula okathi, khula etthu yaakhumelenle, khula ettheneeri, khula namithaka, mukhalelo aya, etthu yiirans'aya, ni nooruuha moovirani mwa wahala mpakha ele yookiserya, khukweretha vaavale vale vakwaaturu, epantte ya exiri. Nto vamaalihaly'ahu, Eroho Yowarya yaahirwa khupaka nreko na etthu yeeyo vaxirini, khinuupululela eyo Mmansaya vaava va hiyo othene.

⁴⁴ Vano, kiiraka yeela, kinniroromela, wira wookiseryani wa yeela Eyo enimoorwa n'itthu yuulupale ni onooniha-tho wira hiyo nri okathi wa wookiseryani.

⁴⁵ Akavi a nyuwo yiiwale sa Kennedy...Soohimya sa Mukhulupale Kennedy, moolumo ni sikina? Akavi yiiwale ehimeryo ele s'oholo, wira 1 ya Janeiro, yoohimmwa wira Estadu Unidu ni Ruusiya sothene sinrowa okhala ittuurwa sa vulkawu? Ti yeeyo tu entthun'ahu. Vahooxa ovikana sinuupuwel'ahu. Munnona? Tivo, vakhala wira hiyo nri vakhiviruxa mpakha atthu a elapo ela anihimy'aya etthu ila yoothukumeliha murima wira enookhumelela, vanreerela hiyo nikhale ookasooa, sothene mwa nihiku, olapa wothene wowiiriwa, sothene soolikana, 'okhala wira khanisuwenle okathi xeeni Pwiy'ahu onrowaawe oniihana. Nto Owo aaihanaka vale, "Nwele osulu nno," vanreerela okhala oolikana. Ni enrowa orwa okathi muhinuupuwelel'anyu.

⁴⁶ Muhakalih'ole muulupale wa Pentekosite onoomala vano. Hiyo ninnoona mapuro othene, ottikinyeya wuulupale wookiserya. Mutthaka wookhuma. Sothene soolikana vano, sinoolipelela. Ekereja yoothhitiwa ekanyeryo. Atakhali anootepa wira sootakhala. Ikereja sinootepa okhala sookhaleleya. Atthu oowaarya anootepa omwaattamela Muluku. Soovaha sa Eroho sinimuncereriwa mmakhuruni makhaani.

Hiyo nri wookiseryani w'okathi. Oh, okisivela esipo ele niipak'ahu mukereja.

Kinwehererya orwa wa Nihiku nle nootthapa
na mileeniyu,
Okathi Pwiya'ahu oottotopeliwa onrw'awe
omukuxa Mwaakameliwa Awe onwehererya;
Oh, murim'aka onimunla, oninlela nihiku
nenlo n'otaphuwa woosiva,
Okathi Moopoli ahu onthikel'awe-tho elapo
ya vathi.

⁴⁷ Kilipelelaka okathi yoowo! Vano, kapiitulu 5 ni versiikulu 5, hiyo ninniphwanya, mwa nisomi nahu nivinre, wira naahilavula mwaha wa Mmusi Nvuluxa, yoowo ninsuwel'ahu wira aari Kristu. Nimulikanyihaly'ahu ni Ruthi: Ruthi athanlaka; Ruthi arumeelaka; Ruthi amumulaka. Othanla, waari okhalihwiwa naxariya; orumeela, wiikhaliha oolikana, oreerihwiwa; omumula, waari na Eroho Yowarya, mpakha Niira n'Othelana orwa. Moota enireer'aya!

⁴⁸ Ekereja yaahivira mwa John Wesley, okhalihwiwa naxariya, ahiiso... Martinho Lutero, okhalihwiwa naxariya; mwa John Wesley, oreerihwiwa; mwa Pentekosite, opatiiso wa Eroho Yowarya; nto vano, omumula, elipelelaka Orwa wa Pwiya Aya. Voolikana ene!

⁴⁹ Mmus'ihu Nvuluxa, mahumu yaahikhalana exariya okathi yaamwiihanaly'aya Owo Mwaapwittipwitthi, aahalela okhala Kharamu, ntoko mphuki. Owo aari Mwaapwittipwitthi, moosuwela, ni Eliivuru yoothukiwa ikanyeryo thanu na piili. Vakuxiwaaya Eliivuru, muteko wo olapela waahimalihwiwa.

⁵⁰ Vano, ekapiitulu 3, Ekereja yaahiwela osulu, masi vano okathi wo woowopoliwa ohanle wuupululiwa; moota Ekereja yaavulu—yaavuluxiwaaya, wuupululiwa wa etthu ekhumelenle okathi wa Ekereja. Moone, Ekereja yoorowa, vano Owo vano onimooniherya, ekapiitulu 5, moota Owo iiraly'awe, etthu ekhumelenle, moota Owo othhitaly'awe ekanyeryo Ekereja. Wuupululiwa wa Nsina Nawe; opatiiso wa maasi, nirumeelaka Nsina Nawe; Ekumi Ehinimala; kahi omooroni Ohinimala; epyo y'enowa; Nroromelo Ohinimala; miixuttiho sothene suulupale, othommwa, wa Ekereja, wuupululeliwe Ekereja. Owo onooniherya moota iiraly'awe.

⁵¹ Vano, Mmus'ihu onivahiwa Eliivuru yoothittiwa ikanyeryo thanu na piili ya Nvuluxo ni Mwaneene ene. Amen! T'ani aari, hiyo nimphwany'ahu wira, aari Mwaneene ene? Muluku Mwaneene. "Nto Mwaapwittipwitthi aahirwa khukuxa Eliivuru mmatatani noolopwana na Ole aakilanthe Veehiceni." T'ani aari Mwaapwittipwitthi? Nvuluxa, Mmus'ihu Nvuluxa, Mmusi a Ekereja, Yoowo aaruule khunvuluxa Isarayeli.

⁵² Vano ninrowa okela mwa yeeyo voosiis'ula. Isarayeli aahivuluxiwa, masi iyo khayaaheliwe yaawo, 'okhala wira awo yaahimukhootta Owo. Masi, Ekereja ehaakhela ovuluxiwa waya, ni Owo ti Mmus'ihu Nvuluxa. Ntoko Bowazi aahaana onvuluxa Nowemi, wira akhale ni Ruthi, Mmowabi, namurwa, Mmalapo; vano Kristu aahinvuluxa Isarayeli, aahihelela nvuluxo, vano khukhoottiwa.

⁵³ Munnuupuwela nlevelelo, mulopwana oopeliwaawe, yeeyo imaara kamosa-kamosa kinihim'y'aka? Okathi w'ekhotto y'aneene n'aneene, okathi. . . Owo aari mutthu ooreera murima. Owo aari oohitheka, vano awo khumphwanya-no nthowa. Onamwi, owo aarina nthowa mwa enamuna emosa, wira aarootthyawa okathi w'ekhotto. Vano khuphwanyaniwa nthowa ni aarowa woopeliwa. Vano mulopwana mmosa khurowa wa Mukhulupale Lincoln khwira, "Mwenye Lincoln, ola mulopwana mmosa muKristu. Owo aarootuthuwa. Mmiravo, kinnaasuwela atthu awe. Owo aarimoova paahi. Owo khaalakenle wira ya manyala. Khutthyawa." Khwira, "Mwenye Lincoln, eri mmatatani mwanu. Ti nyuwo paahi munwerya omulevelela."

Mwenye Lincoln khukuxa nipattuuxa n'epaphelo ni ekaneta awe, khulepa, "Ooleveleliwa," *Lexe* ola. "Abraham Lincoln."

Owo khutthimaka arowaka mukhatteya, khwira, "Ela va. Koophwanya oleveleliwa wanyu."

⁵⁴ Nto mulopwan'owo khwira, "Kinnikhootta oweha. Waarowa okhalana ekanyeryo yuulupale vaavo. Yaamuhimya sothene. Nyuwo muneererya okikhaliha nnyemulo. Kahiyo Abraham Lincoln. Mutthu ti mutthu aamuwerya olepavo nsina nawe. Masi yaahaana ophariheliwa ekanyeryo awe, ni siiso, vaakhanle wira enikhuma wa yoowo." Vano mulopwan'owo khimukhanyererya; nnya mulopwana aari mukhatteya uupuwela wira owo iira iperwa, owo aahirukunuwa khurowa.

Voosiisu aya, owo khoopeliwa. Vano nto voopeliwaawe, waahikhala ophuka opwaro wa milattu feteraale, okhala wira Abraham Lincoln, iwoora miloko miili ni xexe mulopwan'owo ahinatthi woopeliwa, aahilepa nsina nawe wira mulopwan'ola aahileveleliwa. Vano nto kuveerunu khumoopela, khula enamuna. Nto xeeni? Vano opwaro wa milattu feteraale ya Estadu Unidu, khwira, khurwa nlamulo nla na opwaro Feteraale, khwira, "Nlevelelo khanihiyo nlevelelo vahikhanle wira nnimwaakheliwa ntoko nlevelelo."

⁵⁵ Ni Yesu aahinvuluxa Isarayeli oKalvario. Masi khanaari nlevelelo w'awo, okhala wira awo khayaakhenle ntoko nlevelelo. Masi, mwa nisomi nahu vano na isumana iya miloko mithanu na miili, ninniphwanya wira awo annitthika khwaakhela oleveleliwa waya. Masi, Owo ovulunxe Ekereja, vano hiyo

nooleveleliwa okhala wira nihaakhela Ephome ya Yesu Kristu ntoko oleveleliwa wahu.

⁵⁶ Vano, ninniphwanya wira Owo aari Mmus'ihu Nvuluxa, ni Owo aahikuxa Eliivuru mmatatani mwa Mwaneene eekeekhai. Ela etiitulu y'ekhalanelo ya nvuluxo. Hiyo noophwanya eyo. Munnuupuwela osoma? Eyo etiitulu y'ekhalanelo. Owo muteko w'esiiri ni yeeyo, wira Muluku aavekenle ekumi nipuro na okhwa, omatta wEdeni. Vano, Yesu, Ole okhanle naxariya, khukhwa khukuxa etiitulu y'ekhalanelo, ni aahiwerya otaphula Ikanyeryo, wuupulula ele yaari Memmo; khwaavaha yoorithi, yaari Yawawe, atthu Awe. Ekumi Ehinimala, Owo orinthi awe mwaha wo wira yeeyo, Owo khuthikela okawanya Ekumi Awe Ene, oKalvario, khukawa eriyari ahu ni Eroho Yowarya. Amen! Khaavo mutthu otonko (nnakhala) owerya ophiyerya wuupuwelela ophenta xeeni waari uwo, etthu Owo iiraly'awe!

⁵⁷ Satana, ole aatonko okuxa mwaha wo ottheka omatta, onootthukiwa ariheliwe Vantthiyani va Mooro. Mahiku awe aamala.

⁵⁸ Yesu, mwa Ehapari yooreera, aarina ithoonnyeryo xexe. Hiyo noovara eyo. Mwaana a Davidi, mulipa-oorithi Ehice; Mwaana a Abrahamu, yoovaha y'emwene; Mwaana a mutthu, mulipa-oorithi elapo; Mwaana a Muluku, mulipa-oorithi sothene. Yoovaha y'emwene!

⁵⁹ Waataana Wa Khalayi, yookhalana khayaakhanle khayaakhanle okhalaniwaka voovikana iyaakha miloko mithanu. Khivaaweryaneya omalamalihiwa wa mwaneene eekeekhai voovikana iyaakha miloko mithanu. Nto nihiku nanamiloko mixexe Owo aahiliva esisapo. Nihiku nanamiloko mithanu, ovuluxiwa ni owerya waari wa Ekereja, waarimenle omatta wEdeni, waahivuluxiwa khuhokoloxiwa, khuveleelihiwa hiyo ni opatiiso wa Eroho Yowarya, nihiku nanamiloko mithanu.

⁶⁰ Nto hiyo nihoona ela, esapala. Hiyo nookuxa isapala, moota esapal'ela aavahereriwaawe mmatatani mw'Awe. Moota Yeremiya, mwa Yeremiya 32:6, munn'awe, Hanameyeli, aahimuhiyerya yoorithi. Nto awo jaarowa w'epothani. Yeeyo, onrowaahu woota, ni yoowo, voosis'ula: w'epothani. Nto eyo yaaheliwe mmwaapuni w'oloko; enooniherya vatthu owerya wa Muluku, ni isapala ni isiiri sa Muluku, sinsuweliwaaya, mmurimani. Etthokiho ahu ya ovuluxiwa, yaaheliwa mmiyaapuni s'oloko, Nsina na Yesu ni muupululo.

⁶¹ Ninnoona wira ela yaatthukiwe ni Ikanyeryo Thanu na piili, ni khula Ekanyeryo yaari yowuupaanyiwa. Nto okathi waarw'aya wuupululiwa, Owo aanikumiha Ekanyeryo ene, aanitaphula yeela n'usoma etthu yaahimya Ekanyeryo ene. Vano Owo aanitaphula yaattharelana, esapala, n'usoma etthu yaahimya Ekanyeryo ene. Aanitaphula ele yootharelana, aanikumiha ni woota etthu Ekanyeryo eyo yaahimya, ni

ole waari muupululo ene. Ti yeeyo Ikanyeryo sahu Thanu na piili, ninrowaahu okelela vahilekenle, ninroromel'ahu, wira enimwiiraneya. Khula Ekanyeryo, yakumihiwa muLiivuruni, enrowa otaphuliwa, ni eyo enimooniherya voolikana ene etthu yaakhumelenle.

⁶² Ninniphwanya wira sookhala ithanu “thanu na piili,” mw'etthokiheryoni ya ovuluxiwa. Thanu ti nummaru nene. Ni sookhala ithanu na piili thanu; Ikanyeryo Thanu na piili, Irooho Thanu na piili, malaikha mathanu na maili, Malope Mathanu na maili, ni okathi mithanu na miili wa ekereja. Tivo, moone, ithanu na piili thanu ti mahala. Thanu mahalaa, ni thanu na piili ti olikana. Vano eyo enimweetta oratteene voolikana, moone. Vaareera.

⁶³ Ntoko, khula Ekanyeryo entaphuliwa mwa Masu a Muluku, enimuupululela mutthu a okathi yoowo, okathi zeeni onkhal'ahu, erooho ya okathi, ekereja ya okathi. Wiisuupulula 10, wookiseryani, ninniphwanya wira okathi etaphuliwaaya Ekanyeryo yookiserya, ninniphwanya Nlaikha neemenleene ni nnawu nimosa mutthayani, ni nimosa mphareya, ni matata Aya nivenxenryeene Wirimu, ni ekhweyi vamuru Vaya, nimulapelaka Ole onkhala voohimala mahiku othene, wira okathi woomala, okathi Ekanyeryo yookiserya. Ni nyuwo mulipelele mpakha nikelele Ikanyeryo iyo noone vari Ekanyeryo eyo.

Vammal'anyu ophwanya isumana miloko mithanu na miili, nto moone vari Ikanyeryo, “Okathi woomala,” ovuluxiwa woomala, Owo vano ti Kharamu ni Mphuki. Owo ti Moopoli anyu voosiis'ula, masi nihiku nimosa Owo onookhala Mphuki anyu.

⁶⁴ Ya 8 mpakha 1 . . . versiikulu 14 y'ekapiitulu 5, enuupulula okathi wa Mwaapwittipwitthi okokhoreliwa, wothene Wirimu ni vathi; Eliivuru ya ikanyeryo thanu na piili, Mwaapwittipwitthi oophwanela, Mmusi Nvuluxa. Nto okhuma versiikulu 8, mpakha 14, Malaikha animukokhorela Yoowo, mahumu animukokhorela Yoowo, Soopattuxiwa sikumi sinimukokhorela Yoowo. Ni Yohani aahimukokhorela Yoowo vanci-ene mpakha owo wira, “Soopattuxiwa sothene Wirimu, vathi, vathi v'elapo, saahikiiwa kiiraka, 'Nttotopelo, ovuwa, owerya, ankhili, ti sa Mwaapwittipwitthi.” Okathi wo okokhoreliwa wa Mwaapwittipwitthi Mwene. Vano, Ekereja yoorowa, muupuwele.

⁶⁵ Vano nrowe nimukhunle Daniyeli, kapiitulu 9, versiikulu 1 mpakha 3. Vano nto ninrowa okuxa 20 mpakha 27, khula wira nno ovekela wa Daniyeli paahi. Kintthuna wira musome-tho yeela mw'evirelo ya esumana, vano, mpakha mwiiwe saana.

Eyaakha yoopacerya ya Dario mwaana a . . . nloko n'atthu a oMeda, aakhalihwe mwene a omwene w'Akhalteya;

Eyaakha yoopacerya ya omwene awe miyo Daniyeli...-tthokelela, kaahitthokelela ni iliivuru wira nummaru na...iyaakha, masu a Muluku saamuhimenryawe profeta Yeremiya, owo aarowaawe omaliherya iyaakha miloko mithanu na miili opwetexiwa w'oYerusalemu.

Vano (yootharelana) kaahirukunxela ethoni aka w'Apwiya Muluku, wira kaaphavele kilompaka ni kaavaraka metto, kitthukaka, kiwaraka mattapwatta, ni ettuurwa:

...Kaahaavekela APWIYA...Muluku, kilapaka,...

⁶⁶ Nto onoorowa akelelaka ohooolo, mpakha nimphiyaahu vano eversiikulu 20. Wira nuurele okathi, athu yeemenleene, kintthuna mphiyee 20, mpakha niphiyerye vano e—eversiiikulu 20.

Nto nlelo kilavulaka, kilompaka ni kihimyaka sootheka saka ni sootheka s'athu aka a Isarayeli, ni kaavarelaka metto APWIYA Muluku aka mwaha wa mwaako woowaarya wa Muluku aka;

Nlelo, kilompaka siisaale, mulopwana Kapiriyeli, yoowo kaamoonalyaka mwa yoowoona wopaceryani, opacerya...aahirwa avavaka ni waakuwa, aahikikwannya okathi waaheliwaaya mukuttho wa makaaripi.

Owo aahikihimeerya, ni aahilavula ni miyo, khwira, Nyuwo Daniyeli, miyo kirwenle wookhaliheryani osuwela olaleya iwo.

⁶⁷ Ankhi vaakhanle wira naahiwerya okhala weiwo paahi! Owo aamuphwannye sayi? Alompaka.

Nlaikha, "mulopwana." Mooweha, owo aamwiihanne Owo, "mulopwana." Ni ary'ene a...

Nto vapacenryanyu ovarela metto yookhuma yooruma, (yaakhumenle wira owo arowe), nto miyo kirwenle wooleelani; tthiri nyuwo munniphentiwa vanci-ene: vakhala...vano nwiriyane oratteene, ni mutthokelele wooniheriwa iwo.

Isumana miloko mithanu na miili sookumiheriwa athu anyu ni muttetthe anyu woowaarya, ahiiso muttetthe anyu, wira simalihiwe sootakhala,... omaliha etampi, ni oleveleliwa sootheka, ni exariya enoolipihwiwa voohimala-tho, siiso onoomaliheriwa wooniheriwa ni moolumo eeprofeta, ni onoottikitheliwa ole Oowarexa.

Vo ti vari mawoko mathanu na mosa wa orwa Wawe. Vano nwehe.

Vano, tivo, *musuweleke ni mphaveleke wiwa oratteene*, (vano nwiriyane) *wira okhuma okathi orummwaaya olokihiwa ni otekiwa-tho Yerusalemu mpakha...Mesiya Mukhulupale sinoovira isumana thanu na piili, . . . isumana miloko mithanu na mosa ni piili: ni iphiro sinootekiwa-tho, ni makokoro, okathi w'ovelavela.*

. . .siviraka isumana miloko mithanu na mosa ni piili Mesiya onimwiiviwa, masi woohikhala mwaha wa yoowo: nto atthu a mukhulupale ontthuna orwa—mukhulupale ontthuna orwa. . .onoopwetexa muttetthe nnipuro noowaarya; emalelo aya enookhala ni mwanamukhaya, . . .eruhaka ekhotto n'ihasara erumihiwe.

Nto owo onimwaataana (mwiiwe) ni wiilipiha n'atthu a maloko manci-ene mpakha esumana emosa, emosa wa isumana iya miloko mithanu na miili: vano varyiari va esumana onookhottiherya mukuttho ni . . .ni soovaha, nto elatarato yoowuuliha muru enoopwehiwa nipuro noorekamexa n'empa, mpakha omalihiwa, nto ele erumihiwe onooyeeheriwa mulipa-ooopwetexa.

68 Vano, vo ti nri nisomi nahu na mithukumano miraru, mixexe, mithanu sinoorwa, ele Apwiya anrowaaya wuupulula. “Isumana miloko mithanu na miili.”

69 Vano, kinrowa onvekela Doc, atthuna vale, olelo ohiyu, wira ahele ekwaaturu aka vale, wira kiwerye okweretha. Nkintthuna wira muhaleele. Vano muhaana osoma ni miyo, ni osoma oratteenexa, ahiiso munoohaleela. Ni kintthuna kikwerethe va vakwaaturu yooriipa, vano nto nyuwo muruue ilaapi sanyu ni ipaphelo nto mulepe mahiku ala, okathi ula, ni sothene sa yeeyo.

70 Vano, esumana yanamiloko mithanu na miili enipacerya (vano mwiiwe saana ela) nuumala Ekereja okuxiwa. Vano, atthu othene answela saana eyo, yiire, “Amen.” [Muthukumano oniira, “Amen.”—Mol.] Vano, nuumala Ekereja okuxiwa.

71 Wiisuupulula 6:1, mpakha Wiisuupulula 19:21, ephitaanyanne ni esumana yanamiloko mithanu na miili, tivo nihaana weemela nileeliherye, nihinatthi orowa ottaiwene. Nihaana weemela nileeliherye xeeni isumana iya miloko mithanu na miili. Okhala wira, mwaahiire siiso, munoohaleela Ikanyeryo iye, munoohaleela Malope awo, munoohaleela Mihasa iye, Ihasara iye, irooho iye tthaaru soonanara ntoko anaphulu, Otakhaliwa iwe miraru, oriheliwa wa ehanasi yooxeerya, muthiyana vansuwani. Munoohaleela sothene, mwaahiire siiso, 'okhala wira sinkhumelela vaava va mwa esumana yeela ya namiloko mithanu na miili. Ti vaavo sinkhumelel'aya.

72 Vano, profeta Daniyeli aahikhala oPapilooniya iyaakha miloko mithanu na mosa ni iyaakha thanu na tthaaru. Nyuwo

munthuna othola ihimyele sene, ni wuurela okathi vakhani, kaarin'aka ki—kiphavelaka. Iyaakha miloko mithanu na mosa ni thanu na tthaaru! Owo aahirowa w'epotthani eyaakha ya 606 A.C., nto okathi omurwenly'aya wooniheriwa waari—waari 538 A.C. 538 okhuma 606, sinihala miloko mithanu na mosa ni thanu na tthaaru. Iyaakha miloko mithanu na mosa ni thanu na tthaaru owo aahikhala oPapilooniya, eriyari y'apakawu, nave nlelo aahiphwanya oxintta. Amen. Hiyo khaninwerya okhala ewoora emosa.

⁷³ Masi owo aahikhala eriyari ene, ahikhanle hata mutthu masi axirikha araru, n'awo yaarisa ipante soovirikana s'omwene owo. Masi, Daniyeli, ary'ene meekh'awe ni Muluku, aahivarelela oxintta iyaakha miloko mithanu na mosa ni thanu na tthaaru. Muupuwele yeeyo! Nkinthuna opacerya olaleya, okhala wira ola ohaana okhala Mutthaka wo wiixuttiha. Masi, iyaakha miloko mithanu na mosa ni thanu na tthaaru, owo aahivarelela oxintta ni aari ooloka ohoolo wa Muluku; ahirina opatiiso wa Eroho Yowarya, ahirina Ephome ya Yesu Kristu wira emulapelele yoowo; ni ephome ya inyompe soolopwana paahi, ni ya ipuri s'olopwana, ni amwaanyompe oothiyana, yaawo aavah'awe mukuttho wiiphiini, mwaha wa ilimalelo s'epakawu sa muttetthe yoole. Awo yaahikuxiwa erohiwaka weiwo. Yeremiya aahilaleerya mwaha wa yaawo, wira yaamurowa weiwo.

⁷⁴ Vano, Daniyeli, oh, wulu, owo aahipacerya woona wira okathi waanikhuveela, ntoko hiyo olelo. Daniyeli aahipacerya “osuwela saana,” owo khwira, “kisomaka iliivuru.”

Nto eyaakha yoopacerya y'omwene wa . . . Daniyeli . . . y'omwene miyo Daniyeli kaahisuwela ni iliivuru nummaru na . . . iyaakha, tivo . . . masu a APWIYA yaamuhimenry'aya Yeremiya profeta, wira saahaana ovira iyaakha miloko mithanu na miili mu . . . opwetexiwa wa Yerusalemu.

⁷⁵ Yeremiya, 606, A.C. aahilaleerya, mwaha wa itampi saya ni otakhala, wira yaarowa okhala iyaakha miloko mithanu na miili.

⁷⁶ Muupuwele, aahikhala profeta mukina aakhumelenle mahiku ale. Nkinwerya wuupuwela nsina nawe vano. Khino kinoowerya woohimeeryani muhina—muhina mwa minuutu vakhani, kuupuwela-ru okathi vakhani. Masi owo aahikhumelela khwira, “Yeremiya, moovonya. Muluku onrowa omukhaliha Isarayeli iwe mahiku oowaatta paahi, oowaatta, oophiyaka iyaakha piili.”

⁷⁷ Yeremiya khwira, “Ekhale siiso. Amen.” Owo khwira, “Masi nwehererye minuutu mmosa. Nrowe nyuwo ni miyo nitthokelelane mmosa ni mukhw'awe, ntoko maprofeta.” Owo khwira, “Muupuwele, aakhala ale alalenrye hiyo nihinathi,

n'awo yaahihimya itthu saavonyeiye. Nto Muluku aahiwana yaawo mwaha w'ohimya itthu soovonyeya. Tivo, nikupali. Masi Apwiya Muluku aakileela wira soohala iyaakha miloko mithanu na miili nlelo."

Muluku aahimwiiva profet'owo oowootha, khukumiha ekumi awe eyaakha yeeyo, okhala wira Muluku aahimuhimeerya profet'ola eekeekhai wira saari iyaakha miloko mithanu na miili.

⁷⁸ Nto kintthuna wira nwehe moota Daniyeli, nlelo ary'ene namurwa, okumihiweene w'atthu awe, okumihiweene mukereja mw'awe, ohikhanle hata okokhorela omosa mukereja, ehikhanle hata ekereja y'orowa-wo, sihikhanle hata isipo woohikhala iye iip'awe mmansawe, varyari va sothene iya, nlelo aanivarelela ele profet'ole aahimaly'awe. Amen! Amen!

⁷⁹ Hata ekereja y'orowa-wo, hata mutthu oothukumana-no; atthu othene yaarowa mpaani m'okokhorela mw'apakawu, atthu othene yaakokhorela amuluku aya eethiru. Hata isipo s'eKristu; khaavo hata mutthu aamini etthu emosaru owo aamin'awe. Nto mwa iyaakha miloko mithanu na mosa ni thanu na tthaaru, okhuma ary'ene mmiravo a iyaakha soophiyaka muloko ni piili, muloko ni xexe, okathi waaroihiwaawe, owo aahikhala oororomeleya wa Muluku; ni aahisuwela ni profeta Yeremiya wira mahiku yaahalela ophiyerya.

Elopolelo xeeni iyo ya murima wa khula profeta eekeekhai a Muluku olelo, wira niweheke ottuli ni woona etthu profet'ola eekeekhai aahimaly'awe, n'usuwela wira niri okathi wookiserya.

⁸⁰ Owo iirale, "Kaahisuwela saana ni iliivuru Yeremiya, munn'aka, iyaakha, iyaakha sene khalayi, aalalenry'awe wira Isarayeli aarowa okhala wenno iyaakha miloko mithanu na miili. Nto okathi ene yoowo ohanle ophiyerya." Vano owo khwiilikanyiha. Nto owo aahilaleerya otthuka, khwiireeriha, nto okathi... ettuurwa n'uwara mattapwatta, khuhela vamuru wawe, khukhala atthukaka ni alompaka, wira asuwele saana sa mahiku awo yaakhal'aya.

⁸¹ Nto vakhala wira Daniyeli, profeta a Apwiya, aahiweya oweha eliivuru ya Yeremiya, ni khumuphiiherya nipuro ntoko nlo; wira hata Isarayeli akhumaka, othene aya akumi, yaakhuma oPapilooniya, ethikelaka elapo aya, yaanimwiiriha owo otthuka n'uwara mattapwatta ni ettuurwa. Vaahitepa Ekereja ya Muluku mukumi wira siiso, osuwela wira okathi onoomala ni khonihala-tho; ni Orwa wa Pwiya Yesu Kristu, ni Mileeniyu yuulupale yoolikana wira epacerye! Ninwerya sayi ohonona okathi woorikaxa, nimweettaka cuuku, nirapelelaka mahiku a Ttiminku, ohikhalana okathi wa Apwiya? Anrowa paahi... Pastore alavula etthu ehinoosivelani, munoovenya khunakhuma. Ni e—ekereja yapisa vanci-ene, vano, nyuwo—

nyuwo, nyuwo—nyuwo munoonyoonyeya. Nkawehani mukhalelo ahu. Nkawehani etthu eniir'ahu.

Mulikanyihe makhalelo ahu ni profet'ole. Mulopwana mmosa paahi, muhina momwene wothene, ehikhanle ekereja y'orowa-wo, ni hata nipuro nikina n'orowa-wo. Yaahipwanyuliwa khupahiwa; muttethe awe, atthu yaari mw'epotthani. Iyaakha miloko mithanu na mosa ni thanu na tthaaaru! Miloko mithanu na mosa ni thanu na tthaaaru, miloko mithanu na mosa ni thanu na xexe, miloko mithanu na miili; saamuhalela iyaakha piili. Vano vapaceny'awe osoma muliivuruni khoona wira okathi waanikhuveela wira omaliherye, omaliheriwe, owo aahimurowela Muluku alompaka, wira asuwele ya yeeyo.

⁸² Okathi xeeni! Niniira-ni hiyo? Okathi, "Ilapo sinihononey'aya; epahari enooruma mirukulu; mirima s'atthu sinoovolola mwaha wo woova; sooxanka mwaha w'okathi." Itthu iya sothene, yoolepwa vaxirini. Ovalaana wa maloko; inamuna sothene sa itthu sootakhala siniiraneya molumwenkuni; n'uvaanyihana, ni ikhotto, ni ivelavelelo. Ni ikapwitthi sithomeiweene mpwaro, mpakha elapo ekhaani ya munnuwelo ntoko Cuba ohitto nno ekhanly'aya ohononaka olumwenku muhina mwa minuutu muloko. Vano anoonyakulihana mmosa ni mukhw'awe, atthu ootakhala ahimmusuwela Muluku ni ahinsuwela owerya Wawe.

Ni Eroho Yowarya Mukereja, yeettaka varyari v'ale Oothanliwa, yiisooniheryaka Eneene ekumi siviraly'aya iyaakha ikonto piili, wira Owo mmosaru nsana, olelo, ni mahiku othene. Ninwerya sayi hiyo oweha voonyoonyiwa? Ninwerya sayi hiyo ovira vasulu va yeeyo? Okathi waarowaahu owehaweha, owehaweha okathi uwo muulupale onikhuveela.

⁸³ Vano, owo aamusomme Yeremiya, kapiitulu 25. Nrowe nikhunle mwa Yeremiya, kapiitulu 25, nisome ele Yeremiya aarin'awe ohimya. Vekeekhai, nrowe nipacerye versiikulu 8, 'okhala wira ti. . . Kintthuna kikupali wira munimwiiwa saana. Eversiikulu 11 ti nipuro kaalepaly'aka va wira kisome, masi nrowe nipacerye versiikulu 8.

Tivo anihimya t'APWIYA a anakhotto; . . .

Miyo okisivela eyo. Kaaweryaka omwiiwa profeta ovenya ni SIISO ANIHIMYA T'APWIYA MULUKU, munna, yeeyo tu. Wa miyo, eyo ennimaliha mwaha. Ti yeeyo tu.

. . . anihimya t'APWIYA a anakhotto; Okhala wira khamuniwa masu aka,

Moone, Miyo kinooruma ni othukumanya maloko othene a elapo y'onikela ephayo, anihimya t'APWIYA, ni Napukutonosoori mwene a oPapilooniya, murumeyi aka, kinimwaaruuhela-tho atthu awo. . . elapo ela va,

wira yootupheleni nyuwo, ni etuphele maloko othene mwaattamanannyanyu, ni kinoohonona, . . .

Muupuwele, awo yaari atthu othanliwa a Muluku Owo onaahimy'awe. Awo khayaari oohaamini. Awo yaari atthu a mukereja.

Kinoomaliha nsu n'elulu, . . . n'ukhuwela vootthapa, (siiso ntoko sirin'ahu olelo, rock-and-roll othene, Ricky ni Elvis,) ni, oh, nsu na mutheli, . . . nsu na mwa . . . ahiiso, mwaakameliwa, kiireke, oruma wa nxilo, . . . woona wa muthuko.

Elapo ela yothene enookhala othako, . . .

Nkamwiiweni profet'owo akhuwelelaka, "Elapo ela yothene enookhala othako!" Nto voohimutakiha murumeyi muulupale ola a Muluku, masi kinnilaleerya wira elapo ela yothene enookhala othako. Muluku onoohukhumu elapo ela mwaha wa itampi saya. Vakhala wira Muluku khaamuhiyale Isarayeli, othanliwa Awe, Osuulu w'Abrahamu, yoowo Owo apakann'awe waataana ni natiri, vakhala wira Owo khaahiyale awo yiiraka soonanara; enamwi yaari anatiini voomalela, yaahikhalana ikereja suulupale, ni anamukuttho, ni marabbi; masi mwaha wa soohifayi ni itthu eriyari aya, nto Muluku aahahepiha ele yaalaly'aya, siiso enimwiiraneya ni hiyo. Versiikulu 11:

. . . elapo ela yothene enookhala othako, ni . . . oxanka; . . .

Eyo enihimya wira, atthu othene anooweha ni wira, "Awo ari vo. Awo yaari atthu oowerya. Nkaaweheni vano."

. . . ni maloko ala anoomurumeela mwene a oPapilooniya iyaakha miloko mithanu na miili.

Eyo ti wii ekumi yothene. Okhuma okathi ame anyu, oowuuluvale ooreerihwa waary'aya mwaana. Awo yaarisa iwe ehirina Muluku, ehikhanle ekereja, ehikhanle esipo, ehikhanle hat'etthu, nloko nothene, mpakha nloko nle nothene noottheka okhwa.

Vano nuumala ovira iyaakha iyo, miloko mithanu na miili, kinoomuhukhumu mwene a oPapilooniya, ni elapo yeeyo, anihimya t'APWIYA, mwaha wa sootakhala saya, ni elapo yoKhalteya, ni kinootatuxa yeeyo okhala othako wa mahiku othene.

Ni kinoomaliherya elapo yeeyo moolumo aka othene ahimalyaka mwaha wa yeeyo, n'itthu sothene silempwe mulivuruni-mu, seiyo Yeremiya silaleiy'awe avirikanyaka maloko othene.

Tthiri maloko manci-ene ni mamwene oowerya awo-tho—awo-tho animwaarumeela: ni kinimwaahukhumu. . . kittharihaka makhalelo aya, ni kittharihaka moolumo aya ni miteko saya.

Tthiri siiso APWIYA Muluku a Isarayeli yaahikihimeerya wira; Mukuxe mmatatani mwaka ekah'ila ya oviruha waka, murowe, mwaawurihe atthu a maloko othene, onoorumaakani-wo.

Mwa moolumo makina, “Yeremiya, miyo kihoovahani mutthak’ola. Muhikilaathi khumaala. Muhikhale nipuro nimosa, masi mulaleerye maloko othene.” Munnitthara? [Muthukumano oniira, “Amen.”—Mol.] “Mulaleerye maloko othene. Mooniherye ithoonyeryo Saka ni mitikiniho, ni mwaasuwelehe wira Miyo kinimoorwa wira yeela.”

Nto atthu awo ewuryaka, anoovevereya, anoovahuwa, mwaha wa moolumo anrowaaka waaruuhele.

⁸⁴ Atthu aniira-ni mahiku ala? Awo aniwiihanani pro—profeta oowootha, aniwiihanani mu—mulipa-ooiisakaleliha, aniwiihanani na—namathipelela, nahako, wala namaloha a sooloha, wala etthu ntoko namathokosa miyuupuwelo. “Awo anoovahuwa!” Nto nuulumo *ovahuwa*, mwatholathola vale, nnihimya “mulolo.” “Awo vekeekhai anoovahuwa, ni wira, ‘Ah, muhimuxikhe santu-oophirikeya ole, ethiru ile,’ mwaha wa Masu anrowaaka waaruuhele.”

⁸⁵ Munnoona ehantisi ene etthikelaka? Yeremiya khaakupali aFarisi aya, aSatukhi, a Herothi, etthu p’itthu yaary’aya. Owo, owo aalavunle Masu paahi, nto Awo khwaakhalaha oovahuwa wa yoowo. Exeeni? Vano nwehe.

Vano nto miyo kaahikuxa ekahi mmatatani mu’APWIYA, khwaavaha owurya atthu a maloko othene, yeeyo . . .

Yeremiya khaahanle owaani. Yeremiya khaakhanle nipuro nimosa paahi naamukhaani, masi owo aahaavaha owurya maloko othene.

. . . yaawo APWIYA yaakirummy’aya:

⁸⁶ Yeremiya aahikuxa Masu a Apwiya, eviinyu ya Masu Aya. Ni eviinyu ti owerya wa Masu Aya. Eviinyu yookhalana owerya. Eviinyu ti yoochapala. Eviinyu yookhalana owerya ottuli waya. “Vano kaahikuxa Masu a Apwiya,” oohimya Yeremiya, “khoodiherya Yaawo. Eviinyu, owerya ori mwa Yeeyo, miyo kaahiira ohoolo waya, vano awo khayaatthuna wiiwa Yaawo.”

Muluku iirale, “Vano Miyo kinrowa waaroiha oPapilooniya iyaakha miloko mithanu na miili.” Ti yeeyo pahi Owo iiraly’awe. Naxariya ni ootakhala yaahirowasa, vamosaru.

⁸⁷ Vano, nitthikeleka nisomi. Daniyeli aahikhala asomaka. Muupuwele paahi, Daniyeli aasoma Masu mamosaru hiyo ninsom’ahu voosis’ula. Daniyeli aamusoma Bibilia yoola, omaliherya omosaru, moolumo mamosaru, etthu emosaru miyo, ni mukhaliheryo wa Muluku, kinrowaaka woosomelani

Mmitthakani kamosa-kamosa sintharelana, etthu emosaru, wira kiwooniheni wira hiyo nri wookiseryani w'okathi.

Ni Daniyeli, alavulaka Masu mwa Yeremiya, aahirowa mpakha oPapilooniya. Ni owo aari profeta oottikittheliwa. Ni owo aanipaka miiriirya, ithoonyeryo, aaniwerya otaphulela malavulelo oohisuweliwa, ni aniipaka ithoonyeryo ni mitikiniho eriyari aya. Nave, ary'ene meekh'awe, mmansawe! Amen! Owo aakhala meekh'awe.

⁸⁸ Masi Yeremiya aahilepa Masu ala iyaakha, iyaakha sene khalayi. Ni Daniyeli, ataphulelaka Masu, aahiphierya... "Wira, vano nwehererye minuutu mmosa. Ninnikhuveela wookiseryani w'okathi, maana kookhala nno iyaakha miloko mithanu na mosa. Ni profeta a Apwiya," amen, "mun'aka, profeta eekeekhai a Muluku iisoonihenrye mwaneene okhala profeta, oonilaleerya. Kookhalana elempwe va muliivuruni, ehimyaale wira, 'Sinoovira iyaakha miloko mithanu na miili.' O Pwiya Muluku, hiyo ninikhuveela woomalelani. Nloko nlo nothene noomalama. Nyuwo munrowa wira exeeni vano, Pwiya? Nyuwo moonilaiherya oniveleliha..." Vano yoowo aahiilikanyihya, wira alompe.

⁸⁹ O Muluku, vakhala wira waahitoko okhala okathi onthuneya hiyo wiilikanyihya, wira nilompeke, ti vano. Tthiri, hiyo ntoko arumeyi Awe eekeekhai, ninnoona, ni Ipaphelo sa murummwa, ni olopolo wa Eroho Yowarya, wira niri mahiku ookiserya. Eroho Yowarya ennihimya Yeeyo. "Mahiku ookiserya, atthu anookhala oothipelela, oowiisoona, oosiveliwa n'itthu sa vathi ohiya opatthana ni Muluku, oohaataaniheya, oowootherya akhw'aya, oohisumaaliha, oowaanyokha atthu ooreera murima." Miyo kinnisuwela saana ni Epaphelo.

⁹⁰ Ni miyo kinnisuwela saana wira anookhumelela atthu ooveeha, mahiku ookiserya. Kinnisuwela wira enookhala elapo entuphela elapo ekena, mahiku ookiserya. Kinnisuwela wira anookhala maasi oosimukha, mahiku ookiserya. Kinnisuwela wira ithoonyeryo soowoopiha, ntoko itisku sinvava, osulu, ithoonyeryo sootikiniha, nto mirima s'atthu sinrowa ovololaka mwaha wo woova. Onookhala oxanka w'okathi, ni oriipiwa murima varyari v'atthu. Kinnisoma wira othene aya anookela mmitthenkesoni ni miromolelo, ni okhalana mwaataano mmosa, mahiku ookiserya. Kinnisuwela wira athiyana anoorowa ometha maihi aya mahiku ookiserya. Kinnisuwela wira awo anoowara ikuwo sookhuveya, ni weetta ni ixapattho sa mixitta soorekama, erumihaka okathi aneett'aya, mahiku ookiserya. Kinnisuwela wira olakeya onrowa omora mahiku ookiserya. Kinnisuwela wira alaleyi anrowa okhala amakampusi oowootha mahiku ookiserya, anrowa wiisakaleliha, ni ahinrowa waalyihya atthu Masu a Muluku, masi anrowa ottharaka iyaaminelo ni itthu, ohiya vo. Masi kinnisuwela wira ninookhala Nsu nimosa ninrowa orwa mahiku ookiserya, nikhuwelaka mothakoni,

niwiihanaka atthu otthikela Mutthaka w'ekeekhai, otthikela itthu sa Muluku. Kinnisuwela, ni Eliivuru, wira itthu iya sinookhumelela.

⁹¹ Kinnisuwela wira mahiku ookiserya enimoorwa etala. Ikereja sinrowa okhala soowitthokihaxa, ni sookhalihwiwa ni sothene, wira mahiku ookiserya enimoorwa etala, ni khenrowa okhala mwaha wa yolya ni maasi paahi, masi yo wiiwa Masu eekeekhai a Muluku. Nto atthu anoorowa okhuma onkhuma nsuwa, okhuma onkela nsuwa, onkela ephoyo, ni okuusini, ephavelaka wiiwa Masu a Muluku eekeekhai. Masi ikereja sinrowa okhala sootthokihwaxa ni soohela mukaano, mpakha anrowaaya wiiwa Yaawo. Kinnisuwela yeeyo ni Iliivuru. Masi, nihiku nenlo, O Muluku, enookhala Yoophuwa enrowa okhuma wa Davidi.

⁹² Kinnisuwela wira Owo onoomuruma Eliya nihinatthi orwa nihiku nle wookiseryani w'okathi, ni owo onrowa okhalana Mutthaka mmosa onrowa orukunxa mirima s'ana otthikela w'axitiithi, waattikiherya ele yooloka, otthikela wookiseryani, ni opacerya. Kinnisuwela wira eyo enrowa wiiraneya okathi vakhani Eroho ehinatthi ohiya ekereja y'Amalapo, otthikela w'aYuta.

⁹³ Ni nkinsuwela mwaha wa Epaphelo paahi. Kinsuwela ni Masu, ni Masu oolempwa, wira Isarayeli onootthikela muttetthe awe; ni kinnimoona akelaka.

⁹⁴ Kinnisuwela ni Ipaphelo, sa maprofeta, wira Isarayeli onookhala nloko. Awo anookhalihwa okokhorela mpaani m'olompa. Muluku onoorowa ovara-tho muteko ni yaawo awo yarwa vale elapo aya. Oh! Maprofeta maili anookhumelela mahiku ookiserya, ni yaawo. Kinnisuwela yeeyo. Vekeekhai okathi Ekereja y'Amalapo enrowaaya, maprofeta maili animoorwa, Eliya ni Moise, wIsarayeli. Ninimoona okathi onikelel'ahu ohoolo.

⁹⁵ Profeta aahoona wira okathi waahalela ovira oPapilooniya iwe. Vaareera.

⁹⁶ Kapiyeli onoorwa, wira uupulule kahi ele owo aavekel'awe, masi wira amuhimeerye sothene saakumiherelewiwe nloko n'aYuta, mpakha woomalelani. Amen! Owo aarookoha vakhani, khwaakhela etthu yothene. Owo aarookoha paahi wira asuwele. . .

⁹⁷ Daniyeli aaphavela osuwela, "Ehanle sayi-tho, Pwiya, onrowa okhala naanaano? Yeremiya profeta, murumeyi Anyu, munn'aka, aahilaleerya iyaakha miloko mithanu na miili khalayi, iirale, 'siri iyaakha miloko mithanu na miili atthu ala anrowaaya okhala wenno.' Nloko nothene na khalayi noomalama vano."

⁹⁸ Nookhala nloko n'apentekosite na khalayi naakhumelenle, iyaakha miloko mixexe khalayi. "Anakhotto a khalayi,"

yihaniwaaya. Awo ahiitthokiha, aanyakulihana, ni aawana, mpakha Mwaako Horebi ni Nebo, ephiro eyo yothene. Masi, vookiserya, hiyo niri omuratthini vano. Owo onrowa ovenxa etthu esya, ni Yoxuwa wira aalapuxe. Ikano soovonya; Moise aahirowa ni seiyo; Moise aahivonya. Yoxuwa khwaalapuxa. Hiyo ninnoona wira mitthenkeso soovonya, masi Eroho ya Muluku. . . Yoxuwa, nuulumo *Yoxuwa*, nnihimya “Yesu Moopoli ahu.” Wira, Eroho Yowarya enookela Mukereja. Kahi mutthenkeso, masi Eroho Yowarya enookela eriyari y’atthu ni okhaliha Yeeyo yoolikana wira ewele, omulapuwa Yordani. Kinnisuwela mwaha w’osoma Eliivuru wira ti yeeyo eri wira ekhumelele. Ni Muluku onnisuwela wira ti yeeyo eniphavel’aka vano, wira kihaana waakurunuxa murima atthu Awe ni waahimeerya etthu eri vakhiviru, siiso va voosiis’ula, ni mapuro ifiita iya sinrowaaya-wo, olumwenku wothene, wira niri wookiseryani w’okathi.

⁹⁹ Owo ohuupulula sothene mpakha Omwene oreheriwa voomalela ni eMileeniyo okela. Owo waari mutthaka wa Kapiriyeli. Owo khwira, “Kihoorwa woohimeeryani wira siri iyaakha miloko mithanu na miili, isumana miloko mithanu na miili, nlelo, sookumiheriwa atthu anyu, sookumiheriwa mpakha emalelo ya nloko n’aYuta. Siri isumana miloko mithanu na miili.” Vano nwehe etthu Owo aahimaly’awe. Wira vano, opacerya ekhumelo mpakha oreheriwa. . .

Isumana miloko mithanu na miili sookumiheriwa atthu anyu ni . . . muttetthe, . . .

“Muttetthe anyu.” Papilooniya khawaari muttetthe awe. T’ani . . . Muttetthe awe waari woowi? Yerusalemu.

¹⁰⁰ Vano, naaphiyeryaka tha—thanu na piili, ahiiso elipiheryo thanu na mosa, ninoophwanya muttetthe xeeni uwo, ni ninooruha ni wooniherya aari pani, t’ani aakhalinhe, nipuro okhumaly’aya-wo. Okathi xeeni onrowaaya okhala? Onootttikela-tho otekiwa? Okathi xeeni? Oh, itthu suulupale sinniniwehererya. Vaareera.

Isumana miloko mithanu na miili sookumiheriwa wa atthu anyu ni wawinyu . . . muttetthe, wira simalihuwe sootakhala, . . .

Vano, Owo khanahimyeke wira, “Daniyele. . .” Khivanihovereya wira Owo aamuhimenrye wira isumana miloko mithanu na miili saari. . . kintthuna ohimya wira, iyaakha miloko mithanu na miili saahala omalela. Miloko mithanu na mosa ni thanu na tthaaaru, saahala iyaakha piili paahi. Ni ninnoona wira elaleeryo ya Yerehiya yaari yoolikana voomalela. Iyaakha piili ohoolo waya, awo yaahirowa. Nehemiya aahirowa khuphwanya nrumelo na mwene, khuteka makokoro okathi w’ovelavela. Awo yaahivarasa muteko. Owo khwira, “Makokoro. . .” Nwiriyanee ela.

... *simalihiwe sootakhala, ... omalihiwa wa etampi, ...*

“Wira emalihiwe etampi.” W’ani? aYuta. “Sookumiheriwa wa athhu anyu,” kahi w’Amalapo. “W’athhu anyu,” aYuta. “Ni muttethe anyu,” kahi Nova Yorke, kahi Boston, Filadelfia, Chicago, Los Angeles, Rooma. Masi, “Muttethe anyu,” Yerusalemu.

... *ni simalihiwe sootakhala, ... omalihiwa wa etampi, ... oleveliwa sootheka, ni exariya enoolipiheriwa voohimala-tho, ni omaliheriwa wooniheriwa ni moolumo eeprofeta, ni onootikittheliwa ole Oowarexa. (Nwehe!)*

Tivo musuweleke ni mphaveleke wiwa oratteene, wira okhuma okathi orummwaaya olokihiwa ni otekiwa-tho Yerusalemu (yoowo waari muttethe awe) mpakha... Mesiya Mukhulupale sinoovira thanu na piili (sa miloko mithanu na miili) isumana, ...

¹⁰¹ Nwehererye mpakha nikele mwa yeeyo! Oh, wulu! Eyo eparakha wira miyo ... kinoorowa ophwanya mukhoyi kiitthuke va.

¹⁰² Aahuupulula eyo mpakha, khwira, “Nkinrowa woolelani paahi naanaano va wira iyaakha iyo piili sihanle ophiya, sinrowa omalihiwa, omaliheriwa.” Ni hiyo othene noosuwela wira awo yaahikhala weiwo iyaakha miloko mithanu na miili voolikana, nto—nto khukhuma—wo, siiso ntoko profeta saahimaly’awe. Ni Yesaya, ahiiso kinihimya ... Daniyeli aanimwaamini profet’ole, tivo owo aari va, oolikana. Vaareera. Ni owo ...

¹⁰³ Nto vano, Kapiriyeli varuuly’awe, Owo iirale, “Kirwenle owoonihani sothene, owuupululelani itthu iya, wira, sothene mpakha woomalelani.” Munnona? Nwehe.

... *yoowuliha muru owo onootatuxa okhale othako, mpakha woomalelani, ...*

¹⁰⁴ *Woomalelani* ti “omala wa itthu sothene.” “Kinrowa owoonihani enrowa okhumelela.” Vano nwiriyane. Mwiiwe! “Miyo ... Daniyeli, koorummwa. Nyuwo moophentiwa Wirimu. Ni Miyo kihiiwa mavekelo anyu nto kihoorwa vano woohimeeryani etthu elamuleliwe aYuta ni Yerusalemu, okhuma naanaano va mpakha woomalelani, etthu yothena.”

¹⁰⁵ Vano, munniiwa saana, athhu? Nawerya vale osuwela ele ekhanle isumana iya miloko mithanu na miili, ninoosuwela ele ekhanle woomalelani. Oh, wulu! Muluku anikhaliherye osuwela. Enninihimeerya nipuro nene muhina mwa makukhu ala, vekeekhai okhuma okathi uwo mpakha okathi ula, mpakha woomalelani, ni khenrowa ovonyeya hata minuutu mmosa.

¹⁰⁶ Moota Masu maalupale a Muluku ... Okathi Muluku opattuxaly’awe elapo ya vathi khuhela mphironi mwaya.

Nto miyo kaamulaleya ohiy'uwo, Ttiminku ohiyu, moota ehikhanly'aya hat'etthu enivonyeya. Vano, olumwenku ula onoorukurerya voolikana mpakha vanweryaney'aya ohimeeriwa okathi nsuwa ni mweeri sinrowaaya ovira, iyaakha miloko miili okhuma olelo, minuutu woolikana. Miyo nkinwerya wooleelani, ni hata eroroco emosa nirin'ahu molumwenkuni; enoovonya minuutu miili wala miraru khula mweeri, wala wuncererya minuutu miili wala miraru, yoolikanexa erin'ahu. Hiyo khandwerya okhaliha hat'etthu voolikana siiso. Okhala wira, eri etthu emosa paahi ekhanle yoolikana voomalela, owo ti Muluku. Ni Muluku ni Masu Awe ari mmosaru, tivo Masu a Muluku t'olikana voomalela.

¹⁰⁷ Nto nawerya vale ophwanya mahiku ala, ninoophwanya vekeekhai okathi xeeni onrowaaya okhala emalelo. Munniiwa saana? [Muthukumano oniira, "Amen."—Mol.] "Yoolamuleliwa mpakha woomalelani." Eversiikulu 24, "atthu anyu ni muttetthe anyu woowaarya," okhanle Yerusalemu. Kookhalana 21... versiikulu 24 va. Yesu aahihimya yeela mwa Matewu 24.

¹⁰⁸ Vano, Munna Collins, owo akhala va voosiis'ula, nkisuwente sinto ookhala wala nnari. Mwa sookoha ohiyu umosa, owo aahikoha etthu. (Kinoona wira khiva mulattu miyo ohimya, Munna Collins.) Ya, "'Yootakhala yoowuuliha muru,' munnoona, etthu yaahimya'aya?'"

¹⁰⁹ Yesu aahilavula yeeyo, mwa Matewu kapiitulu 24, ni hiyo ninnisuwela. Ayo, Matewu 24:15. Vano mukihye kirowele yeeyo vowaakuya, wira nweye woona, Yesu alavulaka va etthu emosaru, athikelaka omuhimya Daniyeli. Matewu 24:15, wa nyuwo munlepa. Kintthuna wira, khula mmosa vano, vanci-enexa olelo ohiyu ni—ni Ettiminku enrwa, muruue ilaapi ni ipaphelo, 'okhala wira hiyo nri... 'voohikhala wira munimwaakhela efiita. 24, eversiikulu 15, "Vano okathi nto..."

*Vano moona yootakhala yuulupale yoowuuliha muru,
yeeyo yaahimmwe ni profeta Daniyeli,...*

Muupuwele! Ela ti imiya xexe ni miloko mithanu na miraru ni tthaaru, -xexe, -thanu, iyaakha miloko mithanu na miraru ni thanu na mosa khalayi ene. Iyaakha imiya xexe ni miliko mithanu na miraru ni thanu na mosa khalayi ene.

*...profeta Daniyeli, eemenleene nipuro
noowaarya,...*

Vano nwehe mBibiliani mwanyu. Eri muhina mwa iparentesi.

... (ole onsoma, iiweke:)

¹¹⁰ Vano, Owo onlavula n'aYuta. Awo yaatthuna osuwela, "Ankhi emp'ela yo okokhorela? Enrowa opwetexiwa liini? Enrowa otekiwa-tho liini? Onrowa okhala okathi xeeni

nihinrowaaya ohala nliku nimosas vasulu va nikhw'aya? Onrowa ovira okathi xeeni yeeyo?"

111 Owo khwira, "Moona 'yootakhala yuulupale yoowuuliha muru, evenyihweene...' Daniyeli, 'eemenleene nipuro noowaarya.'" Khwira, "Moona yeela wiiraneya, vano ole onsoma iweke etthu owo onihimy'awe."

Mwaha wa yeeyo hiyo eninvekel'ahu Muluku, wira akhalihe yeeyo yoolikanexa, mpakha ohinrowaaya okhala hata ohoverya. Okhala wira, khanirina ohelela otaphulela wahu mmansihu itthu iyo. Ehaana orwa ni SIISO ANIHIMYA T'APWIYA. Tivo, miyo kinihyaaka vaavo vo mpakha kisuwele saana.

Aahimuupululela itthu sothene yoowo, "yoowuuliha muru" yeeyo.

112 Nto, muupuwele, erina ihmeyelo piili, ntoko, "Koomwiihana mwan'aka wEjitu." Ntoko Isarayeli iihaniw'awe; siiso-tho Yesu, Mwan'Awes, aahihaniwa.

Nto siiso t'enrowaaya wiiraneya, vekeekhaixa ntoko seemenly'aka va. Ni Owo aahiira mwa enamuna emosa, ni Owo okhalihale yoowiipitihwa, yothene yowiiipitiheriwa Ekereja. Oh, naphiyerya-ru yeeyo, esuwelelo eyo thanu na mosa, moota Owo iipitiheny'awe yothene ela Ekereja; wira Ekereja ekhale ewehawehaka khula minuutu, ehisuwelaka okathi Owo aarow'awe orwa. Masi vano okathi wa Ekereja ohanle omala, ti yoolikana vano wira Arwe, enimwiilikanyiha paahi.

113 Ela ti emosa wa Soolempwa suulupalexa muLiivuruni. Eyo eniira exeenii? Enihimya emalelo ya nloko n'aYuta, atthu aYuta. Yoolempwa ela, isumana miloko mithanu na miili, enikhunula ni enihimya voolikana okhuma okathi Daniyeli opaceny'awe wu, mpakha ekiseryo ya woomalelani. Eyo emosa wa iroroco suulupalexa. Akavi atonko okiwa kiiraka, "Mwaatthunaka osuwela nihiku xeeni na esumana nla, nwehe ekalentaariyu. Mwaatthunaka osuwela okathi xeeni onikhal'ahu, mwaawehe aYuta?" Ti yeeyo. Iwe t'eri ekalentaariyu ya Muluku, ekumihiwe vaava va. Ni khula teyooloku, khula nammusoma Bibilia, mutthu ti mutthu, onimoolelani wira ela ti eroroco, aYuta.

Vano nirina okathi xeeni? Hiyo paahi. . .atthu, oviha, oh, miyo. . .

114 Eyo kherina naata n'Amalapo; Ikanyeryo iya Thanu na piili, Ihasara Thanu na piili, Otakhaliwa Mithanu na miili, Malope Mathanu na maili, kherina naata. Ekereja y'Amalapo enrowa okhala Moovuwani okathi ene yoowo. Kherina naata ni hiyo, Ekereja y'Amalapo. Eyo erina naata ni Isarayeli paahi. "Daniyeli, atthu anyu ni Yerusalemu."

115 Vano, ni ennikhunula itthu Muluku onivar'awe n'aYuta paahi awo yakhala elapo aya. Aleluya! Ti vaavo kinuupuwel'aka wira yoophwana etthu ene, vaavo vo.

Awo kweekwe anthhuna waalikela okhuma okathi Isarayeli aary'awe weiwo m'okathi wa Daniyeli. Nto mulipa-oolepa muulupale... Okhala wira, koosuwela wira amosa-amosa w'alipa animutthara akilante vaava, nkinrowa ohimya. Masi mwaha wa yeeyo awo akhalaneny'aya etthu yothene ela yoowoothiwa.

¹¹⁶ Mwaanisuwela moota aMilleri, ehinatthi okhala Ativentista a Seetimu Tiiya, etthu yiiraly'aya nno? 1919, yaihenle mapupha, (nyuwo othene mwaahoono eyo muxornaaleni Courier), nto khuwela osulu nno wira evave erowaka, voosis'ule. Eyo waari okuxa isumana miloko mithanu na miili sa Daniyeli. Uh-huh, aMilleri. Vano, ohoolo waya, ni Muhano Ellen White, yoowo aari profeta aya muthiyana, khurukunuwa khwiisihana Ativentista a Seetimu Tiiya. Nto vano awo aarukunxa nsina naya khukhala Nsu n'eProfeta. Munnona? Masina mararu oovirikana a etiini emosaru yeeyo.

¹¹⁷ Vano, masi awo yaahivonya, okhala wira yaatthuna ohelela isumana iyo miloko mithanu na miili w'aYuta ni Amalapo. Nto Owo onihimya va, "Ti y'atthu anyu." Ni Muluku khonatoko ovara muteko n'aYuta ota wa Palestina. Nto okathi Mesiya, iiviwaawe, muhina wa isumana, miloko mithanu na miili ni piili, (kahi mwaha wa Yoowo; mwaha wa hiyo, iiviwaawe), Isarayeli aahimwaramwareya, ni kahi (nnakhala) khanatthikele elapo aya mpakha iyaakha vakhani sivinre. Tivo, vale okathi khiwaalikeleliwe okathi wa Ekereja. Munniwa saana? [Muthukumano oniira, "Amen."—Mol.]

Khiwaarowa okhala 1919. Kinoowerya wooniherya etthu yiiraneiyeye eyaakha ya 1919, masi owo p'ukathi Nlaikha nlo, mutthaka wa Nlaikha naneeraru oruuly'aya ni Otakhaliwa khukhumelela. Voolikana ene. Masi khayaari e... Owo waari okathi ekhotto yaamanly'aya vootikiniha-vo. Eyo nimphwanya kapiitulu 7 naphiyerya vale, naphiyerya kapiitulu 7. Nyuwo othene mookiiwa olaleerya yeeyo, imaara sinci-ene, moone, okathi mutthaka wa Nlaikha wiiraly'aya, "Nvarelele ipheyo sooxeexe sa mulaponi mpakha naatthitte ekanyeryo aYuta, arumeyi." Nto, vano, awo yaahikhala elipelelaka mpakha okathi w'Amalapo omala.

Vano Owo vanikel'awe, nto—nto Owo onaatthitta ekanyeryo aYuta, atthu ikonto miloko muloko ni miloko mixexe n'atthu ikonto xexe anaakhela Eroho Yowarya. Awo t'ale ikonto miloko muloko ni miloko mixexe n'atthu ikonto xexe, ootthittiwa ekanyeryo. Wiisuupulula 7. Nyuwo moosoma.

"Ni kaahoono muttithi muulupale Wirimu," Yohani aahoono, "a maloko othene, ilavulelo sothene, ni ilapo, ni awo yaari ohoolo wa Muluku, yoopaka ikuphi, ewanreene ikuwo sootteela, yiipaka. 'Aleluya! Amen! Ovuwa, n'usuwela,

ni nttittimihō, n'uwerya, n'ikuru, sikhale sa Muluku ahu wa mahiku othene. Amen!' awo anookhuwela."

118 Yohani khaawerya osuwela saana nto. Masi aahiweha khoona Omwaako Sinayi, (ovuwa) ikonto miloko muloko ni miloko mixexe n'atthu ikonto xexe ahiinanarinhe n'athiyana. aYuta! Athiyana, ikereja! Awo khayiitakanxale ni mitthenkeso, Luteraano, Metotista, Patista, ni Prespiteriyaano. Masi awo yaari aYuta okhuma woopaceryani, Ortotoksa, ni yaahikhalana emp'aya mookokhorela iwe, ekokhorelaka Omwaako Sinayi. Awo t'ale ikonto miloko muloko ni miloko mixexe n'atthu ikonto xexe Eyo eniireya nuumala ela; Ekereja eniira ery'ene Mooluwani. Munnona?

119 Tivo, Mwenye Smith aahivonya, aahaana ovonya. Okhala wira, munrowa sayi ohelela yeeyo nno 1919, waakumiha ale ikonto miloko muloko ni miloko mixexe n'atthu ikonto xexe? Vano muntthikela-tho w'aRusselli. Munnona? Vano muntthikela-tho mwiixutiho w'aRusselli, wira, "Yesu ohoorwa 1914. 1919 Owo ookuxa Ekereja Awe. Nto vano Owo erutthu ya siiri eneetteetta mulaponi mothene, ekhumelenle . . . enrowa vamahiyeni v'apiipi ni vamahiyeni v'apwaaapu, ni waahihimuxa awo othene, othene ale yaari aRusselli." Ethiru! Eyo khena maana muhina mwa Masu. Eyo khenikhumela oratteene. Nnari, mulopwana. Khenikhumela.

120 Masi, Muluku ookhalana Ekeekhai. Ni Muluku ti Mmosa onwerya wuupulula Yeeyo ni okhaliha vaavo, ni onooniherya Yeeyo oratteene, hiyo. Munnona? Kinnaamini wira Owo onimwiira. Miyo nkisuwenle. Kinooleelani Ekeekhai. Miyo nkisuwenle, masi kinnaamini. Kinnaamini wira Owo onimwiira.

121 Tivo, moone, Muluku khanatoko ovara muteko n'aYuta. (Kintthuna wira musuke yeela mmuruni) vakhalaru wira Isarayeli . . .

122 Ti yeeyo keeherenryaaka omuhimeerya munn'ola okilanthē va, onihimya mwaha w'orowa wIsarayeli, mukhale ottaiwene wa Isarayeli! Mukhale ottaiwene wa yoowo, nyuwo atthu othene munihimya waarukunxa murima aYuta. Mutthak'ola ohinatthi omala, munimoona wira ti SIISO ANIHIMYA T'APWIYA, ni Masu nave n'Iroho. Isarayeli onoorukunxa murima, nloko nothene, ohiyu umosa. Bibilia ohimmye siiso. Masi Ehapari yooreera kahi yawaya yaawo. Aakhala amosa-amosa ookhootta akhumme, n'akina siiso, ankela, ohiya nloko nuulupalexa n'aYuta, ankela ni woopowa. Eyo ekeekhai. Miyo kinnaamini iyo ni muri—murim'aka wothene.

Masi, muupuwele, vakhalaru wira Isarayeli ori ota w'elapo aya, awo khakhanle woopowaka. Vano awo anoohokolowa. Ni animoopowa othene, nloko nothene, nihiku nimosa. Bibilia ohimmye siiso. Nihiku nimosa; ninoomuruuha, voomalela, Isarayeli othene otthikela wa Muluku. Enoorowa okhala etthu ya

ikuru enrowa ommana Isarayeli nihiku nlo, mpakha enrowaaya ottikinya nloko nothene. Hata profeta aahikhuwela, khwira, “Nihiku nimosa nyuwo muhiira yeela.” Nihiku nimosa, awo animoona Eyo. Enookhala etthu ya ikuru.

¹²³ Wuupuwela waka, onrowa okhala profeta oowerya onrowa okhumelela akhale ohoolo wa Isarayeli, awooniherye wira Mesiya owo nlelo mukumii. Mesiya yoowo awo yaamukhoottaly’aya...?...

¹²⁴ Awo animusoma Bibilia owo mwaamukhaani vano, a Bibilia a Isarayeli. Awo animusoma Yoowo okhuma ottuli arowaka ohoolo, enamuna animusom’aya Yoowo. Ni nyuwo moosuwela moota ninlempwaaya nntaava n’eYuta. Vano nto awo yaamusomaka Owo...Ni awo animusoma ole Lewi Pethrus aaveleelihenry’awe, aBibilia emilyawu ntero. Awo yiirale, “Vakhala wira Yesu ula...” Awo yaari aYuta ale yaaruuhiwe okhuma Irani, ni weiwo, khanatoko wiiwa etthu ene ntoko Mesiya. Nto okathi yaalikann’aya wira etthikele elapo aya, vano, awo khayaarowa owela mmatteekeni mme. Awo nlelo yaalima ni ixaruwa sa khalayi. Nyuwo moosoma eyo murevistani *Look*. Akavi yaasomme martiiku ale a *Look* ni *Times* murevi-...? Vano, vekeekhai moosoma. Munnona? Awo khayaarowa owelasa mme. Rabbi ule mutokweene aarimweemela vale khwira, “Muupuwele, profet’ahu ohimnye wira ninrowa otthikela owaani vasulu va mapupha a xawawe.” Aleluya!

Maloko anoophweeyasa, Isarayeli onoovenya,
Ithoonyeryo Bibilia ohimaly’awe khalayi ene;
Mahiku a Amalapo t’owaalakeya, oosareya
woova;
“Mutthikele, yawinyu, O oomwaramwareya.”

¹²⁵ Vanreera mwiire nvenyaka. Nyuwo muhiwa ni muhiwa, muhiwa, masi enrowa okhala emaara yookiserya, nihiku nlo. Isarayeli onthtikela elapo awe. Nihiku xeeni Muluku omulamulenly’awe Isarayeli okhala nloko nimosa, nlo ti nihiku ohinrowaaya okhala Mmalapo mukina onoopowa.

¹²⁶ Kinimooniherya eyo ni isumana iya miloko mithanu na miili, kawerya vale paahi ophwanya mahiku awo. Kinrowela e...okuxa ekalentaariyu ya osommwa wa ittheneeri ni—ni ya Juliano, osommwa wa ittheneeri, ni y’oRooma, ni sothene iyo. Yookhala-tho, nipuro nlo. Yookhala etthu. Muluku onnisuwela ya yeeyo, ni, Owo—Owo onniwerya wuupulula. Munnona? Koosuwela wira ekalentaariyu ya Juliano erina mahiku imiya tthaaru ni miloko mithanu na mosa ni epantte yaneexexe ya nihiku, mwa eyaakha. Tivo, oh, othene aya aatapanyeya, masi yookhala ekeekhai, nipuro nlo.

¹²⁷ Kinnoona ikereja sinci-ene, mitthenkeso sinci-ene, atthu anci-ene yiiraka *ela*, ni akina “Mutteeliwe Maria,” ni akina ekokhorelaka *ela*, *n’ile*, *ekina*. Ehaana okhala Ekeekhai, nipuro

nlo. Ohaana okhala Muluku mmosa, nipuro nlo. Ohaana okhala Mutthaka mmosa, nipuro nlo. Kinniwoona maprofeta oowootha ekhumelelaka, yiraka ntoko olamula sa mmurimani, ni inamuna sothene sa itthu siniireya. Nto, ehaana okhala emosa y'ekeekhai vo, nipuro nlo, yeeyo ele yoowootha entakihaya-vo.

¹²⁸ Kinniwoona atthu ekelaka mw'erutthu, ni enyakulaka, ni yiraka siiso, n'ukhuma ni weetela makhalelo a khula enamuna. Ehaana okhala Eroho Yowarya yooloka vo, nipuro nlo. Kinniwoona atthu aneetela etiini, ni sikina, ni ephavelaka okhala oothunku. Koosuwela wira ookhala Muluku mmosa ooloka, nipuro nlo. Yookhala Eroho yooloka, nipuro nlo, 'okhala wira namirima miili uwo ontakihaya yeeyo, ole oowootha. Ehaana okhala etthu eri y'ekeekhai: mutthu khata, atthu khata, Ekereja khata, Muluku. Ehaana okhala etthu y'ekeekhai, nipuro nlo, 'okhala wira iya ti itakiheryo sa seiyo. Yookhala etthu y'ekeekhai, nipuro nlo.

¹²⁹ Miyo kaahihimeerya ekerej'ela, mwaha wa soovaha iya. [Munna Branham ommana vapulpitu imaara xexe—Mol.] Mwiiwelele soovaha sanyu; mukhalihe mBibiliyani. Muhikuxe etthu yooranteliha, osulu osareiyeeene-wo iye s'ekeekhai. Nrowe nisuke iye s'ekeekhai. Nrowe nikhalane y'ekeekhai ahiiso nihikhalane hat'etthu. Amen.

¹³⁰ Vano, nimalihaka, ti ekeekhai wira Muluku onivara muteko ni Isarayeli okathi awo ankhal'aya elapo aya paahi. Nrowe nikuxe okathi Muluku... Abrahamu aakhumaly'awe elapo awe khurawa wEjitu, exeeni yaakhumelenle? Owo aahikhuma mwa otthuna wa Muluku, ni khaareerihiwe mpakha otthikela elapo awe. Muluku khaneetteke n'uwo, hata yoowoono emosa, hat'etthu ekina, mpakha owo otthikela elapo awe.

¹³¹ Nkanweheni Isarayeli okathi awo yaaroihiwaaya wEjitu, iyaakha imiya xexe. Hata mwiiriirya, hata ethoonyeryo, hat'etthu emosa khayaakhumelenle eriyari aya, khiivo elempwe muhina mwa wahala a Eliivuru. Vamosaru miloko mithanu na xexe n'athanu na xexe; orowa okereja, ovaha epwittipwitthi, omulompa "Mutteeliwe Maria," wala etthu p'itthu, khutthika. Eyaakha yootharelana, siiso. Anamukuttho othene yaanaakhulana, "Rabbi *Lexe ni lexe!* Ninrowa omuthanla Rabbi *Lexe ni lexe.* Owo t'osomanxe oratteene. Owo onnisuwelexa s'atthu a wEjitu." Naanaanoru, atthu a wEjitu ni—ni othene aya, yaari etthu emosaru.

¹³² Etthu emosaru yeeyo ekhumelenle ni ekereja. Hiyo othene nimalenle okhala aMetotista, wala aPatista, wala Prespiteriyaano. "Ni noophwanya esomelo oHartford! Nihaana esomelo y'oWheaton! Nihaana esomelo ya nipuro nikina, wala Bob Jones! Hiyo, nirina Ekharawu ya Oratti! Nihaana D.D., LL.D., ahiiso etthu ekina!" Eyo ephiyale vayi? Nikuttha na ithiru.

Ti siiso yaary'aya wEjitu. Ni Muluku khonavareke muteko ni Isarayeli mpakha orwa elapo aya.

¹³³ Mukiiwe! SIISO ANIHIMYA T'APWIYA, Muluku khonrowa ovara muteko ni Ekereja Awe mpakha Eyo ethhikele owaani, Mutthaka w'okathi. Mutthikele ele yooloka! Muhiye miyuupuwelo sanyu s'eMetotista, Patista, Prespiteriyaano; Pentekosite anyu, Asempeleya, Unitaariya, Trinitaariya, ni aNeethanu, etthu p'itthu; ekereja ya Muluku, Nasareeno, Anawetta a Osantu, ekereja ya Kristu, sothene miyaalaano sa nwanani a Kristu! Ni kinnisuwela wira ela enimana olumwenku. Sothene soovonya; sothene ti sa xetwani. Oh, wulu! Aakhala atthu ooreera murima mwa khula emosa. Aakhala atthu ooreera murima mwa khula mwaalano. Masi mutthenkeso, ene, kuhiyo wa Muluku, ni Muluku khonrowa oreeriha. Owo khanaireke.

¹³⁴ Kinnimukoha khula namalepa a sookhumela (onrowa wiiwa efiita ela) alepe ni akileele okathi p'ukathi, ekereja yitthokihaly'aya, Muluku khuhihela mwaarumari khuhivara-tho muteko ni yeeyo. Mukileele okathi Owo otonko awe waavenxa-tho aLuteraano, Wesley n'aMetotista, wala aPentekosite. Khanaireke! Mutthenkeso owo omorenle vaavo, khupahuwa ni khuntta! Muluku aahaakuxa atthu khuphalela waathonyerya atthu otthikela elapo aya. Vano nto, atthu ene ootteettheya ni ookenyeya, ni enamuna emosa y'ekharawu, mpakha awo otthokiha mutthenkeso mukina, khimukhaliha vaara vaili mwaana a mookhwaani ovikana saary'awe wopaceryani.

¹³⁵ Masi, nipuro nlo, vekeekhai, Yehova ookhalana mutthu Owo okhanly'awe omuhelelaka matata Awe, ohinrowa wiisakaleliha n'iyoo...-soothunku, mitthenkeso soohifayi; onrowa waahokoloxerya atthu Vamwala, Kristu Yesu, omutthikela pentekosite ooloka ni Eroho Yowarya yooloka, ni ithoonyeryo sooloka ni mitikinho sooloka. Vekeekhai Owo ookhalana mmosa, nipuro nlo, ohinrowa wuuramela vathi va khula enamuna y'olupatthiwa, ohiya, wunteerya, omora, etthu p'itthu ekina; onrowa okhala ni yeeyo.

Muluku khanamureeriheke Isarayeli mpakha orwa elapo awe.

¹³⁶ Muluku khanrowa wooreerihani, Mmetotista, muPatista, Prespiteriyaano, muKatolika, wala Nawetta a Osantu, Nasareeno, ekereja ya Kristu, wala—wala mutthenkeso Pentekosite. Owo khanrowa wooreerihani siiso. Mutthikele elapo anyu, woopaceryani, mutthikele musuwelelo wa pentekosite ntoko siireiyaaya Nihiku na Pentekosite okathi Owerya wa Muluku mukumi waarukunxaly'aya atthu ale ikonto sene, khukhaliha mirima saya sivihiwaka ni Mooro wa Muluku, woonihenrye yooloka; kahi ithoonyeryo sootakiha,

kahi othokosa miyuupuwelo woopakiwa, kahi eveeheryo, ephiyenrye okhala woomolana wa makhule ntoko sirin'ahu wAmerika. "T'ani onwerya okhalana eheema yuulupalexa?" Ahiiso, "T'ani onwerya okhalana muttitthi muulupalexa?" Evirikanelo xeeni iyo eniir'aya wa Muluku? Muluku onaathuna athu a xariya mmurimani, kahi muttitthi muulupale. Ni hiyo othene nookhalana woomolana wa makhule nno, antthyawa. Otakhaliwa xeeni, wira noone vakhala wira ninoowerya owuncererya-tho ekonto emosa mmutthenkesoni mwahu. Iwo otakhaliwa. Owo onthuna wira nitthikele mw'Ekeekhai, otthikela Muroohoni, otthikela Mowaaryani w'ekeekhai, otthikela ephiro yuulupale mwa Kristu, otthikela mw'Ekeekhai. Owo onrowa onireeriha sayi enamuna ninrowaahu? Owo khanrowa.

¹³⁷ Owo khanatoko omureeriha Isarayeli mpakha awo otthikela muttetthe wa natiri. Nto okathi atthikenly'aya muttetthe wa natiri, ithoonyeryo ni mitikiniho saahipacerya wiiraneya. Owo aahaaveleeliha mulopwana mmosa eriyari aya, iihaniwa Moise. Moise ola aarwiye n'ixeeni, ni teyoloxiia ooratteliwa? Owo aarwiye ni Ekharawu ya Oratti? Owo aarwiye ni LL.D., Ph.D.? Owo aarwiye ni owerya wa Yehova, ni mutthaka mmosa, "Mutthike, elapo ela, murowe elapo anyu. Mutthikele, yawinyu, O oomwaramwareya." Amen!

¹³⁸ Iyaakha soophiyaka ikonto piili, aYuta ari ota w'elapo aya, aamwareela ipheyo sooxeexe sa mulaponi. Moota naakhanly'ahu olekelihaka Mutthak'ola isumana sene vano, vaakhanle wira naahaana ohimya emosa-emosa. Naamuwerya omuruuha Isarayeli ni wooniherya okathi owo omwariwaawe ni Omwene w'oRooma, mwaha w'omukhootta waya Mesiya; moota oomoleliwaawe khula elapo vathi v'Erimu.

Naammutthikela Yakope, Isarayeli, otthikela Maphattuwelo 44 ni 45, ni wooniherya ottuli wu moota owo aareerihaly'awe axitiithi ale khwaahimeerya saana nipuro naarowaaya okhala mahiku ookiserya. Ni kinoowerya woothoonyeryani oratteene (khula elapo) ya Isarayeli, khula nihimo na Isarayeli, vekeekhai ery'ene ilapo seiyo saahimmwaaya wira saamukhala. Nto hiyo nri va olelo.

¹³⁹ muYuta nimmusuwel'ahu, owo kahiyo muYuta eekeekhai. muYuta eekeekhai ti Ortotoksa eekeekhai ole ohiihononne ni itthu sa molumwenkuni, ole ohikhumme khwiitakanxa n'ikereja sikina. Awo t'ale antthika, anikhala ekhuuraka ekeexu ni mukatthe, ephitenryeene mukerekhere wa matumuxa, ahinthuniheriwa muttetthe wa khalayi. Yaahaana otekeliwa muttetthe epant'ila nno, elapo yoohikhala ya mutthu, ni ikapwitthi sithoonyaka ipantte soopiili. Masi yoopacerya okumiherya maphuwa aya. Amen, ni amen! Okathi ori vakhiviru.

140 Vale ori Iximayeli ni Isakhi, amphwanyaneya vale, enyakulihanaka mwaha wa muttethe, nnakhala vo, masi ti wa Isarayeli. Nyuwo mwaphiyerya-ru orowa oYerusalemu wa naanaano, awo khanrowa wootthuniheryani orwa oYerusalemu wa khalayi. Nyuwo muhaana orowa-wo toko ni waahiya awo wooleliheryani sothene, atthu a wArapiya, vano anooroihani epantte ekina. Awo aana a Iximayeli. Masi, mulipelele, onimoorwa okathi aana a Muluku anrowaaya okuxa. Ti yeeyo. Yerusalemu onoothikela-tho otekiwa. Mukuttho wa khula nihiku onookhalihiwa.

Ni nwanani a Kristu onoopaka waataana wa isumana iyo thanu na piili sookiserya. Nto eriyari aya, owo onoononona waataana iwo, onimwaarukunxela othene aya mw'eKatolika. Yootakhala yoowuuliha muru enrowa omwareela etthu yothene, siiso, vano nto enookhala emalelo.

141 Nwehe, "isumana miloko mithanu na miili." Ayo, sinaattamela iyaakha soophiyaka ikonto piili awo ahikhalansewo; awo aamwareya vano, atthu aya; ntoko okathi waalipihwaaya murima wa Farawo, Owo aahaana olipiha murima wa Hitler. Khukhwa imilyawu sene a yaawo. Nkanweheni Eichmann ula, oottheka mwaha wo owiiva aYuta imilyawu thanu na mosa. Imilyawu thanu na mosa a yaawo, winepa s'atthu, attuutthu, anamwane, aalweene, othene aya miiviwa; Eichmann, mulopwana mmosa. Nkawehani oRuusiya, moota yaakumihans'aya-wo iwe. Awo yaahiwoomolela mapuro othene. Awo ankhalaka nloko noonyokhiwa.

142 Masi mwaha w'ophenta musurukhu aya, awo aahokolowatho. Masi yaawo vakhani antthikela oPalestina. Amen, axinna! Mwamoono opacenryeene orowa elapo awe!

143 Awo aakhalana oophiyerya iwe vano wira emalele ikonto miloko muloko ni miloko mixexe n'atthu ikonto xexe. Nto exeeni eniireya? Awo anoomusuwela Yosefe aya. Muhixanke. Ayo, mulopwana. Ni awo othene amphwanyaneya iwe elipelelaka wiiraneya. Ni okathi ene yoowo . . .

144 Ilapo sohimya wira awo nloko, eyaakha ela evinre. Eyo yaairaneyaka, hiyo nri wookiseryani, Ekereja y'Amalapo yoorowa. Tivo, okathi p'ukathi, Muluku aamuwerya wira, "Isarayeli t'atthu Aka." Eyo yairaneya, Amalapo aamalamala.

145 "Awo anoorowa onyakela," oohimya Yesu, mwa Matewu 24. "Yootakhala yuulupale yoowuuliha muru, awo anoorowa opwetexa makokoro a oYerusalemu mpakha okathi w'Amalapo omala." Eyo yamala vale, vano aYuta anoothikela oYerusalemu, wira ekhalihe-tho empa y'olompa ni okokhorela mpaani m'olompa. Ninoophwanya eyo yothene muhina mwa Mitthaka sinttharelana, isumana miloko mithanu na miili sa itthunelo iye thanu na mosa.

Vano kinoosoma yeeyo kihinatthi omaliha, 'okhala wira wookhuveela okathi nto wa hiyo orowa owaani, vano otthika olelo ohiyu ewoora yaneethanu na piili y'ohiyu.

146 Yoopacerya, yoopacerya, mwaalepaka vale, "Wira simalihiwe sootakhala." Daniyeli, kapiitulu 9, versiikulu 24. "Wira simalihiwe sootakhala," emosa. "Wira emalihiwe etampi," piili. "Wira sileveleliwe soottheka," tthaaru. "Wira elipihiwe exariya voohimala-tho," xexe. "Wira omaliheriwe wooniheriwa ni moolumo eeprofeta," thanu. "Wira ottikittheliwe ole Oowaarexa," thanu na mosā. Nto ti yeeyo enrowaahu olavula olelo ohiyu. Muluku, amaliheryaka!

147 Vano mulipelele, mukihye kitthikele-tho, wira mwiiwe saana. Yoopacerya, "omalihwiwa sootakhala." Yaneili, "omalihwiwa etampi." Yaneeraru, "oleveleliwa soottheka." Yaneexexe, "olipihwiwa exariya voohimala-tho." Yaneethanu, "omalihwiwa wooniheriwa ni moolomo eeprofeta." Yaneethanu na mosā, "ottikittheliwa ole Oowaarexa."

Mukihye koosomeleni vano, mBibiliani. Eversiikulu 24.

Thanu na piili-...*isumana sookumiheriwa wa athu anyu* (aYuta) *ni muttetthe anyu—muttetthe anyu woowaarya* (Isarayeli, aYuta, Yerusalemu), wira *simalihiwe*...sootakhala (emosa),...wira *emalihiwe* etampi (piili),...wira *sileveleliwe soottheka* (tthaaru),...*olipihwiwa exariya voohimala-tho* (xexe), *ni onoomaliheriwa wooniheriwa* (thanu)—*wooniheriwa ni moolumo eeprofeta, ni ottikittheliwa ole Oowaarexa* (thanu na mosā).

148 Eyo veekhai t'ile Owo aarwenly'awe omuhimeerya, wira saamurowa wiiriwa, vano nto yaamukhala emalelo.

149 Vano, ohiy'ula ninimoona iye sikhlanle itthu iya, ni woona moota ory'ahu vakhiviru va weiwo. Vano nto Ettiminku enrwa, ninooruuha ni ninookhaliha itthu iya s'okathi voolikana mpakha vary'ahu. Miyo kinnimphenta Owo.

150 Isarayeli otthikelaka elapo aya, Isarayeli. Mukihye paahi kihimye ela vano okathi...Kinoona wira khekhanle mufiitani. Mukihye kihimye ela. Okathi ene yoowo Isarayeli onikhal'awe nloko...Mwaha aya kinaamin'aka kweekwe, 'ohoolo wa muxowo aka va, wira yaahikhala etthu kaarowaaka okhalana mpantte, kihinatthi okhwa, omuhokoloxerya Isarayeli w'Apwiya. Okhala wira, okathi ene yoowo, ni epaphelo Pan Amerika, wira Isarayeli aahihimmwa okhala nloko, emaara yoopacerya mwa iyaakha ikonto piili okhuma okathi yaamwaramwareiy'aya, kahi athu; waari okathi ene yoowo, okathi ene woolikana, Nlaikha n'Apwiya naakumann'aya ni miyo iwe khukiruma o...ni Ehapari yooreera. Etthu ene yeeyo, 7 ya Maio, 1946.

¹⁵¹ Vano, nto, etthu ekina enikivaherya osuwela. Ti “orukunxa mirima s’ana w’axitiithi, ni mirima s’axitiithi w’ana,” Mutthaka. Nwehe, Malakhiya 4 (kahi 3), 4!

¹⁵² Etthu ekina. Okathi Billy, mwan’aka, ni miyo, Munna Ern Baxter, naarowaahu oPalestina, vaamanly’ahu othukumana n’aYuta wa Munna Arganbright, ni awo yaahoono muthukumano ene. Lewi Pethrus aahaaveleeliha aBibilia ala iwe. Nto owo khwira. . . aYuta ala khurwa, khwira, “Nyuwo mwawiihanaru nikhuru nimosa n’akhulupale a Isarayeli, kinihimya, kahi marabbi ala a vano ni meera aya othene, masi owiihana akhulupale a Isarayeli vamosa. Ni hiyo noosoma Waataana nno Wa Naanaano, ni noosuwela wira Mesiya arwa vale, Owo onoonihimeerya itthu iya, ntoko muthiyana oSamariya. Noosuwela wira Moise aahihimya wira Mesiya ahu aarowa okhala profeta. Nto mwaahimeerya—ru n’uwooniha, ni Soolempwa,” onrowaahu okelela Mutthaka w’olelo ohiyu, “wira awo yaahaana okhalihwa ohoona ni mirima saya olipihwa, wira opuro w’Amalapo orwe, wira hiyo nikhhalane okathi wo waataana w’Amalapo. Ni mirima saya saahilipihwa siiso ntoko saary’aya okathi wa Yosefe, n’akina. Vano nto waaruha aYuta ale nipuro nimosa, ni owiihana atthu ale vamuthukumanoni vale, siiso ntoko siniir’anyu n’Amalapo ala nno, ni muupuxeryo yoowo wa Eroho.” Okhala wira, awo yiirale, “Vakhala wira Yesu ula, vakhala wira Owo ti Mesiya, ni moolumo anyu yakhala eekeekhai, vano Owo khakhwiye, nto Owo mukumii. Nto vakhala wira Owo mukumii, Owo aahihimya wira aamukhala mw’Awawe. . . aru. . . murumeyi Awe—arumeyi, awiixutti Awe. Ni vakhala wira hiyo ninniweya oomona Owo apakaka ethooneryo ya profeta, vano ninimwaamini wira Owo ti Mesiya.”

Etthu xeeni yoolikanexa, yoolikana oratteene. Vano, eyo yaarowa wira exeeni? Nloko nimosa naamuyariwa nihiku nimosa, eriyari y’akhulupale. Khula mmosa a yaawo aamwiira, “Hiyo noosuwela.” Rabbi ule aahimyaka eyo, eyo ennimaliha mwaha. Nloko nimosa naamuyariwa nihiku nimosa. Isarayeli aamuyariwa nihiku nimosa.

¹⁵³ Nto miyo kaamurowa, vano khweemela oCairo, wEjitu, ni ettikitti mmatatani mwaka, sihalaka minuutu muloko ni mithanu wala miloko miili w’okathi wo wiihaniwa. Awo yaahalela wiihana. Nto miyo khurowa woona ekapatti yaamukhaani ya mphivi ula, ni ettheho ekhaani yaapakiwe ni mphivi, ni ni—niino n’ettheho. Miyo kaarowa onveleliherya meetiku mmosa mpatthani aka, Dr. Sam Adair, wo ophima w’epaphelo. Nto kaamuweha. Nto Etthu emosa khukiirela, “Ola kuhiyo p’ukathi nlelo. Mukhale ottaiwene w’oPalestina.”

¹⁵⁴ Vano miyo khuupuwela, “Kaari miyo paahi kuupuwela yeeyo.” Vano miyo khurowa.

Etthu emosa khwira, “Ola kuhiyo p’ukathi.”

155 Vano miyo khurowa wiithela w’epwaro. Kimuvenxerya muru Muluku. Miyo khwira, “Muluku, mwaari Nyuwo mwaalavula ni miyo?”

156 Khwira, “Ola kuhiyo p’ukathi. Mukhale ottaiwene w’oPalestina. Ola kuhiyo p’ukathi.” Vano miyo kikuxa ettikitti aka khupatiliha, khurowa okhuma weiwe kivira oRooma, khutthikela oLispoa, oPortukaale, okhuma weiwo kitthikela Estadu Unidu.

157 Okathi wiira ohinaphiye. Sootakhala s’Amalapo khasinatthi ophiyerya, sihanle osariha muhasa. Masi nihiku nimosa enimwiiraneya, ni Muluku onoomuruma mutthu iwe okhanle profeta, ni onoowooniherya. Kinniroromela wira Muluku onoomuvenxa naanaanoru, onakhaleru mutthu ti mutthu, onoomuvenxa voowaakuva. Kinnaamini wira ehaana wiiraneya. Ti yeeyo ensomel’ahu ila, wira niri vakhiviruxa.

158 Nto, muupuwele, okathi ene yoowo aYuta animwaakhel’aya Kristu, Ekereja y’Amalapo eniira eronweene. Vano Amalapo aniyeheeriwa ihasara, Ohaawa.

159 Ni—ni vanweryaneya sayi atthu, awiixuttihi aalupale, ni emuwehaka Bibilia ola siisa, ni ohimya wira Ekereja enoovira okathi w’Ohaawa, ehikhanle hata Yoolempwa emosa mBibiliani enihimya yeeyo! Awo kharina hata etthu emosa.

160 Mulopwana mmosa aahikiirela, woohikhala khalayi, khwira, “Oh, Munna muthiyana McPherson aaxuttihaka wira Ekereja yaamuvira Moohaawani, ’okhala wira hiyo ninrowa okhala mithuko soowaarya okathi uwo.” Owo ti Isarayeli nto, kahi Amalapo.

Amalapo aniira eronweene, Ekereja. Awo kharina ovira Moohaawani. “Ehanasi yaahixuwa maasi mwaano mwaya,” kapiitulu 17, “ni yaahiwana n’usuulu waahanle,” mwali oorupa. Kahi. . . Ekereja y’ekeekhai eniira eronweene. Eyo eri Oniirani n’Othela wa seiya, wa okathi yoola oniir’aya Niira n’Othela niiraneayaka, esumana yookiserya. Nto owo p’ukathi Ohaawa onkel’aya, okathi nasope ni olupatthiwa onirweel’aya ikereja, itthu ntoko seiyo.

Vano, wookiseryani, kapiitulu 19, va Eyo enoorwa ni Mutheli Aya. Aleluya! “Mwene a mamwene, ni Pwiya a mapwiya; ikuwo sipwinihiwe mw’Ephome, ni mittitthi s’anakhotto a Wirimu seettihaka ikhavalu sootteela, sirwaaka ni Yoowo. Eyo enoorwa vo, wira ekuxe opuro Aya na Mileeniyu. Amen! Oh!

Nittottopeliwe Nsina, oh, nittottopeliwe Nsina,
Nittottopeliwe Nsina n’Apwiya;
Nittottopeliwe Nsina, oh, nittottopeliwe Nsina,
Nittottopeliwe Nsina n’Apwiya.

Yesu ti Nsina, Yesu ti Nsina,
 Yesu ti Nsina n'Apwiya;
 Yesu ti Nsina, oh, Yesu ti Nsina,
 Yesu ti Nsina n'Apwiya.

Nivuwihiwe Nsina Naya, oh, nivuwihiwe
 Nsina Naya,
 Oh, nivuwihiwe Nsina n'Apwiya.
 Nivuwihiwe Nsina, oh, nivuwihiwe Nsina,
 Nivuwihiwe Nsina n'Apwiya.

¹⁶¹ Munrowa wira sayi? Munikhaliha Nenlo nuulupale mmakhaleloni mwanu. Munikhala makhalelo atthu vakhanly'aya wiiraka, "Ole vale murumeyi a Kristu." Ti siiso munivuwih'anyu Nsina. Nrowe noone. Oh, nyuwo khamunimphenta Yoowo? [Muthukumano oniira, "Amen."—Mol.] Oh, wulu! Esipo ahu ekhaani vano:

Munikulani khalayi, koosuwela wira yaari
 siiso,
 Mwaana aahiyariwa wira awoopole atthu mwa
 itampi saya.
 Yohani aahimoona Yoowo mmafukhe,
 Mwaapwittipwitthi a mahiku othene,

Mwaapwittipwitthi uwo ni Ikanyeryo iye Thanu na piili,
 Mmosa paahi Wirimu ni vathi aawerya okuxa. Muniku- . . .

Munikulani khalayi, koosuwela wira yaari
 siiso,
 Mwaana aahiyariwa wira awoopole atthu mwa
 itampi saya.
 Yohani aahimoona Yoowo mmafukhe,
 Mwaapwittipwitthi a mahiku othene,
 Oh, nittotopeliwe Nsina n'Apwiya.

Oh, nittotopeliwe Nsina, oh, nittotopeliwe
 Nsina,
 Nittotopeliwe Nsina n'Apwiya;
 Nittotopeliwe Nsina, nittotopeliwe Nsina,
 Nittotopeliwe Nsina n'Apwiya.

¹⁶² Okisivela okokhorela. Anghi nyuwo? [Muthukumano oniira, "Amen."—Mol.] Vano, hiyo khaninrwa okereja wira niiwe elaleeryo paahi; eyo eniira mpantta. Masi ninrwa okereja wira nikokhorele, okokhorela mw'Eroho ni mw'Ekeekhai. Nyuwo muhiiwa Ekeekhai; awo Masu. Munnona? Vano, okokhorela, ti wiihimya yeenyu wa Yoowo. Munnona?

Oh, Okisivela Mulopwana Ole a oKalileya! Munirumihele vakhani yeeyo. Ayo, mulopwana. Munnisuwela, Teddy? Miyo kinoolyala vano. Nrowe noone. Nrowe noone.

Oh, kinnimpheenta Mulopwana ole a oKalileya,
 a oKalileya,
 Maana Owo khareere okiirela itthu sinci-ene.
 Owo oolevelela itampi saka sothene, khukihela
 Eroho Yowarya;
 Oh, kinnimpheenta, kinnimpheenta Mulopwana
 ole a oKalileya.

Nampoosito aahirowa iwe olompa mpaani
 m'olompa nihiku nimoso,
 Owo aanikhuwela, "O Pwiya, mukimorele
 ikharari!"
 Owo aahileveleliwa itampi sothene, nto
 murettele woowiixerya waahimukela;
 Owo khwira, "Murwe, mmoone Mulopwan'ola
 a oKalileya."

Oh, kinnimpheenta Mulopwana ole a oKalileya,
 a oKalileya,
 Maana Owo khareere okiirela itthu sinci-ene.
 Owo oolevelela itampi saka sothene, khukihela
 Eroho Yowarya muhina.
 Oh, kinnimpheenta, kinnimpheenta Mulopwana
 ole a oKalileya.

Ootuthunya yaaheettihiwa, oohilavula
 yaahilavulihiwa.
 Owerya iwe waalavuliwe ni mphento vasulu
 v'ephareya.
 Oohooda yaahiphwanyihiwa woona,
 koosuwela wira waaweryaneya okhala paahi
 Owerya wa Mulopwana ole a oKalileya.

Oh, kinnimpheenta Mulopwana ole a oKalileya,
 a oKalileya,
 Maana Owo khareere okiirela itthu sinci-ene.
 Owo oolevelela itampi saka sothene, khukihela
 Eroho Yowarya muhina.
 Oh, kinnimpheenta, kinnimpheenta Mulopwana
 ole a oKalileya.

Mwiiwe ela vano.

Muthiyana veehimeni, Owo aahimuleela
 itampi sawe sothene,
 Moota aakhalann'awe alopwana athanu
 okathi ule. (Ti Yoowo.)
 Owo aahileveleliwa itampi sothene, nto
 murettele woowiixerya khumukela muhina;
 Vano owo khukhuwela, "Murwe, mmoone
 Mulopwana ole a oKalileya!"

Oh, kinnimpheenta Mulopwana ole a oKalileya,
 a oKalileya,
 Maana Owo khareere okiirela itthu sinci-ene.
 Owo oolevelela itampi saka sothene, khukihela
 Eroho Yowarya muhina.
 Oh, kinnimpheenta, kinnimpheenta Mulopwana
 ole a oKalileya.

Kinnimpheenta Yoowo. Ankhi nyuwo? [Muthukumano oniira,
 “Amen.”—Mol.] Murim’aka wothene! Ankhi nyuwo? [“Amen.”]
 Owo kahi ooreerexa? [“Amen.”]

Oh, ooreerexa, ooreerexa, ti Yesu wa miyo,
 (Owo ti exeeni?)
 Namiruku, Mwene a Murettele, Muluku
 Oowerya ti Yoowo;
 Oh, akopolaka, akisunkaka mwa etampi
 yothene ni ehaaya,
 Ooreeraxa ti Nvuluxa aka, nivuwihwe Nsina
 Nawe!

Nrowe nuurame miru sahu vano nuupuwele yeeyo.

Kaahirimeela, masi vano koophwanyiya,
 nkinrowa olamuliwa, (ilapo sinoophweyasa;
 khivancala)
 Yesu onnivaha otaphuwa ni woopowa
 woomalela;
 Owo onnikoopola, Owo onnikisunka mwa
 itampi sothene ni ehaaya,
 Ooreeraxa ti Nvuluxa aka, nivuwihwe Nsina
 Nawe.

Oh, ooreeraxa, ooreeraxa, ti Yesu wa miyo,
 Namiruku, Mwene a murettele, Muluku
 Ooweerya ti Yoowo;
 Akopolaka, akisunkaka mwa etampi yothene
 ni ehaaya,
 Ooreeraxa ti Nvuluxa aka, nivuwihwe Nsina
 Nawe!

Oh, muupuwele yeeyo!

Kaahirimeela, vano koophwanyiya, nkinrowa
 olamuliwa,
 Yesu onnivaha otaphuwa ni woopowa
 woomalela;
 Akopolaka, (Owo oniira exeeni?) akisunkaka
 mwa etampi yothene ni ehaaya, (axinttaka)
 Oh, ooreerexa ti Nvuluxa aka, nivuwihwe
 Nsina Nawe.

Vano vamosa!

Oh, ooreeraxa, ooreeraxa, ti Yesu wa miyo,
 Namiruku, Mwene a Murettele, Muluku
 Oowerya ti Yoowo;
 Vano, akoopolaka, akisunkaka mwa etampi
 yothene ni ehaaya,
 Ooreeraxa ti Nvuluxa aka, nivuwihawe Nsina
 Nawe.

Oh, moota onimphent'aka Yesu, (ovuwa!)
 Oh, moota onimphe. . .

Kinnitthapa koopoliwaaka! Kinnitthapa kinwehererya
 Orwa Wawe!

Oh, moota onimphent'aka Yesu,
 Okhala wira Owo t'opacenyere okiphenta.

Vano ni matat'ahu osulu, vakhala wira ninihimya yeeyo.

Miyo nkimmuhiya Owo,
 Miyo nkimmuhiya Owo,
 Miyo nkimmuhiya Owo,
 Okhala wira Owo t'opacenyere okiphenta.

¹⁶³ Nyuwo munnimphenta Yoowo? [Muthukumano oniira,
 "Ayo."—Mol.] Vano muhaana ophentana mmosa ni mukhw'awe.
 Okhala wira, mwaahaaphenteke ale munwery'anyu owoona
 va, munwerya sayi omphenta Owo muhimoonyal'anyu? Nrowe
 nivahane matata mmosa ni mukhw'awe, niire:

Oh, moota onimphent'aka Yesu,
 Oh, moota onimphent'aka Yesu,
 Oh, moota onimphent'aka Yesu,
 Okhala wira Owo t'opacenyere okiphenta.

Miyo nkini. . .(Munvenxerye matata Yoowo
 vano. Ti yeeyo.) . . .-hiya Owo,
 Miyo nkimmuhiya Owo,
 Miyo nkimmuhiya Owo,
 Okhala wira Owo t'opacenyere okiphenta.

¹⁶⁴ Muupuwele paahi, Owo oonisuweliha muupululo owo
 muulupale. Khanimphenta Yoowo? [Muthukumano oniira,
 "Amen."—Mol.] Owo kahi ooreeraxa? ["Amen."] Moota niry'ahu
 oomuxukhuru Pwiy'ahu Yesu; khanninyanyala. "Moone,
 Miyo kinookhala ni nyuwo, mahiku othene, mpakha. . ."
 Sinnoosivelani *Isumana Miloko Mithanu na Miili Sa Daniyeli?*
 ["Amen."] Oh, khanimphenta Yoowo? Enkhala sayi?

Waamini waka onweha wa Nyuwo,
 Nyuwo Mwaapwittipwitthi a oKalvario,
 Moopoli. . .

Mmukokhorele Yoowo paahi, mmurimani mwanu.

Vano mukiiwe okathi onlomp'aka,
Mukumihe itampi saka sothene,
mukihye okhuma nihiku nla
Kikhale othene Awinyu!

Makhalelo yariipela, (othene niire)
Ni oxanka wakirukurerya, (Ayo, Pwiya.)
Mukhale Muhooleli aka paahi; (Mukeettihaka
ovira memmo, Pwiya.)

Murukunxe epiphi okhale othana,
Muroihe mixankiho ottaiwene,
Nnakhala muhikihiye kikhumelaka
Ottaiwene wa Nyuwo.

[Munna Branham onipacerya wiipa muhina
Waamini Waka Onweha Wa Nyuwo—Mol.]

Mulipihe murim'aka woovolola,
Wiiwaha waka ovare murima;
Murukunxe epiphi okhale othana,
Mukumihe woova waka wothene,
mukihye okhuma nihiku nla
Kikhale othene Awinyu!

¹⁶⁵ O, Yesu, ninnoona wira yookhala enaattamel'ahu. Yesaya profeta aahihimya yeeyo; Yeremiya aahihimya yeeyo. Daniyeli aahiweha ottuli khoona etthu yaahimmwe. Yaahisikulihya murim'awe, ni owo—owo aahirukunxela wiitho wawe Wirimu. Owo aahitthuka, khuwara mattapwatta ni ettuurwa. Owo aatthuna wiiwa, wira awerye waalopola atthu.

¹⁶⁶ Pwiya, hiyo ninnoona Iliivuru, nave-tho, Eliivuru Anyu, Eliivuru ya Yesaya, Eliivuru ya Yeremiya, Eliivuru ya Yakopo, Yohani, Luka, Marku, Matewu, Eliivuru ya Wiisuupulula, Iliivuru Sanyu sothene, wira nihaattamela woomalelani. Ni noorukunxela ethoni ahu Wirimu, nivekelaka, ovara metto, wira nisuwele vankhal'ahu, Pwiya. Noopacerya woona waarya wa nihiku. Ni, Pwiya, hiyo ninoorwa wa Nyuwo. Waamini wahu onweha wa Nyuwo vano. Nihiyaka sothene sinnittiyela, itampi sothene, ohaamini wothene vakhani waarowa onirukurerya vookhweya-vo, hiyo ninniilipiha vano nirowelaka mukaano wo wiihaniwa wuulupale, nisuwelaka wira okathi ahu ti wo waalakeya.

¹⁶⁷ Mwaareerihe atthu ala mu, Pwiya. Awo annoophentani. Awo t'Awinyu. Awo aakhuma. Nyuwo ti Ole onuupulula. Hiyo ninvekela wira Nyuwo munivahe itthu iya okathi onoolipelel'ahuni Nyuwo.

¹⁶⁸ Munivahe oxekuwa wooreera w'osoma, Pwiya. Munivahe mwiiwelo wooloka. Munihokoloxe-tho ohiyu, ookhomaala. Pwiya, mukittikitthele oxekuw'ola, oh, okathi onsom'aka, Pwiya, wa mawoko ala mathanu na mosa a othotola wa Kapiriyeli. Vakhala wira Kapiriyeli aahirwa othotola ni ovaha

soohimya thanu na mosa, Pwiya, hiyo nihaana osuwela yeeyo. Hiyo ninsoma ni Iliivuru ni noosuwela wira niri vakhiviru. Tivo ninvekela wira Nyuwo munuupululele ohiy'ula.

¹⁶⁹ Ettiminku enrwa, Pwiya, O Muluku, muhele mmo mahiku ale. Miyo nkinsuwela sayi, masi Nyuwo munniwerya oniruuha okathi ene yoowo. Munivahe, Tithi. Hiyo ninoolipelelani Nyuwo. Hiyo ninniphentana mmosa ni mukhw'awe ni Ephome ya Yesu Kristu, Mwaana a Muluku, onnirapiha itampi sothene. Hiyo ninweha wa Nyuwo vano. Munikhaliherye okathi onoolipelel'ahuni, Tithi, mwa Yesu Pwiya'ahu.



MIIXUTTIHO SA KAPIRIYELI WA DANIELI EMK61-0730M
(Gabriel's Instructions To Daniel)

ETTHARANELO YA ISUMANA MILOKO MITHANU NA MIILI SA DANIELI

Mutthak'ola wa Munna William Marrion Branham, opaceryawene olaleeriwe ni Enkelesi Ettiminku vaasiisu, mahiku yeettaka 30 mweeri wa Julho, 1961, oBranham Tabernacle oJeffersonville, Indiana, wAmerika, okuxiwe wo okaravariwa mufitani ya makineti khulempwa wothene ni nntaava n'Enkelesi. Otaphuleliwa nno mw'Emakhuwani okhumiheriwe ni okaiwe ni Voice Of God Recordings.

EMAKHUWA

©2021 VGR, ALL RIGHTS RESERVED

VOICE OF GOD RECORDINGS
P.O. BOX 950, JEFFERSONVILLE, INDIANA 47131 U.S.A.
www.branham.org

Olopolo mwaha wa ihaakhi sa mwaneene

Ihaakhi sothene sinnaakiheriwa. Eliivuru ila pooti otthittiwa owaani wira mutthu arumeele wala okaiwa, voohilinwa etthu, ntoko ekaruma y'olaleerya Ehapari yooreera ya Yesu Kristu. Eliivuru ila ehitemihiweke, otthittiwa eyaattelo yuulupale, oheliwa muwepisaiti, oheliwa moothukumanyiwa wira ekuxiwe-tho, otaphuleliwa ni mattaava makina, wala orumeeliwa wira ophwanyiwe musurukhu vahikhanle n'utthuniheriwa woolempwa ni Voice Of God Recordings®.

Mwaaphavelaka wiiwa-tho wala ikaruma sikina sikhanelle, xontte mulavule ni:

VOICE OF GOD RECORDINGS
P.O. BOX 950, JEFFERSONVILLE, INDIANA 47131 U.S.A.
www.branham.org